



ПОМОЩЬ  
НЕБЕСНЫХ ПОКРОВИТЕЛЕЙ

ПОЛНЫЙ  
ГЕОРГИЙ  
МОЛИТВ

НА КАЖДЫЙ ДЕНЬ ГОДА  
(ЛЕТО)

**Помощь небесных покровителей.  
Полный сборник молитв  
на каждый день года (лето)**

ТД "Белый город"

2009

УДК 243  
ББК 86-372

Помощь небесных покровителей. Полный сборник молитв на  
каждый день года (лето) / ТД "Белый город", 2009

Данное издание представляет собой самое полное из ныне существующих  
пятитомное собрание молитв, тропарей, кондаков и величаний. В этих книгах  
можно найти молитвы не только на главные православные праздники, но и на  
дни памяти практически всех прославленных на сегодняшний день святых, то  
есть на каждый день церковного года. В своей работе составитель использовал  
книги молебных пений, издававшиеся в разное время, другие богослужebные  
книги, жития святых с молитвами и т.д. Для широкого круга читателей.

УДК 243  
ББК 86-372

, 2009  
© ТД "Белый город", 2009

## Содержание

Предисловие	10
Июнь	12
1/14 июня	12
Молитвы преподобному Дионисию Глушицкому	12
Молитва первая	12
Молитва вторая	12
Молитва третья	13
Тропарь преподобному Дионисию, игумену Глушицкому,	13
глас 1	
Кондак, глас 8	13
Величание	13
Молитвы преподобному Агапиту Печерскому	13
Молитва первая	13
Молитва вторая	14
Молитва третья	14
Молитва четвертая	15
Тропарь преподобному Агапиту Печерскому, глас 5	15
Ин тропарь, глас 2	15
Кондак, глас 6	15
Величание	15
2/15 июня	16
Молитвы великомученику Иоанну Новому, Сочавскому	16
Молитва первая	16
Молитва вторая	16
Молитва третья	16
Тропарь великомученику Иоанну Новому, Сочавскому,	17
глас 4	
Кондак, глас той же	17
Величание	17
Молитва благоверной княгине Иулиании Вяземской,	17
Новоторжской,	
Тропарь благоверной княгине Иулиании Вяземской,	18
Новоторжской, глас 2	
Кондак, глас той же	18
Величание	18
3/16 июня	19
Молитвы благоверному царевичу Димитрию Угличскому и	19
Московскому, чудотворцу	
Молитва первая	19
Молитва вторая	19
Молитва третья	19
Тропарь благоверному царевичу Димитрию Угличскому и	20
Московскому, глас 4	
Ин тропарь, глас 2	20
Ин тропарь, глас 1	20
Ин тропарь, глас 3	20

Ин тропарь, глас 2	20
Кондак, глас 8	20
Ин кондак, глас 8	21
Ин кондак, глас 4	21
Величание	21
Молитва преподобному Димитрию Прилуцкому, Вологодскому	21
Тропарь преподобному Димитрию Прилуцкому, Вологодскому чудотворцу, ради сретения его образа в Вологде, глас 4	22
Кондак, глас 8	22
Величание	22
Молитва ко Пресвятой Богородице пред Ее иконою «Югская»	22
Тропарь Божией Матери ради иконы Ее «Югская», глас 6	22
Кондак, глас 8	22
Величание	23
4/17 июня	24
Молитвы преподобному Мефодию, игумену Пешношскому	24
Молитва первая	24
Молитва вторая	24
Тропарь преподобному Мефодию, игумену Пешношскому, глас 8	24
Кондак, глас 4	25
Величание	25
Молитвы праведным Марфе и Марии, сестрам праведного Лазаря	25
Молитва первая	25
Молитва вторая, единыя жены молящиися, наипаче в келии наедине чтомая	25
Тропарь праведным Марфе и Марии, сестрам праведного Лазаря, глас 3	26
Величание	26
5/18 июня	27
Молитва благоверному князю Феодору Новгородскому	27
Тропарь благоверному князю Феодору Ярославичу, брату благоверного князя Александра Невского, Новгородскому, глас 8	28
Кондак, глас 4	28
Величание	28
Молитва преподобным Вассиану и Ионе Пертоминским, Соловецким чудотворцам	28
Тропарь преподобным Вассиану и Ионе Пертоминским, Соловецким, глас 8	28
Кондак, глас 2	29
Величание	29
6/19 июня	30
Молитва преподобному Паисию Угличскому, юже творяше братия Покровской обители	30

Тропарь преподобному Паисию Угличскому, глас 8	30
Ин тропарь, глас тойже	30
Ин тропарь, глас тойже	30
Кондак, глас 2	30
Ин кондак, глас 8	30
Величание	31
Молитва преподобному Ионе Климецкому, Олонецкому,	31
Тропарь преподобному Ионе Климецкому	31
(Клименецкому), Олонецкому, глас 4	
Кондак, глас 2	31
Величание	32
7/20 июня	33
Тропарь священномученику Феодоту Анкирскому, глас 4	33
Кондак, глас 4	33
Величание	33
8/21 июня	34
Молитва великомученику Феодору Стратилату,	34
Молитва ко Господу Богу святого великомученика	34
Феодора Стратилата	
Тропарь великомученику Феодору Стратилату, глас 4	34
Кондак, глас 2	34
Величание	34
Молитвы святителю Феодору, епископу Суздальскому и	35
Ростовскому	
Молитва первая	35
Молитва вторая, общая святителям Феодору и Иоанну	35
Суздальским и Ростовским	
Тропарь святителю Феодору, епископу Суздальскому, глас	35
8	
Ин тропарь, глас тойже	36
Кондак, глас 3	36
Величание	36
Молитвы благоверным князьям Василию и Константину	36
Ярославским	
Молитва первая	36
Молитва вторая	36
Тропарь благоверным князьям Василию и Константину	37
Ярославским, глас 2	
Ин тропарь, глас 8	37
Кондак на преставление, глас 8	37
Кондак на обретение мощей, глас 4	37
Величание	37
Молитва ко Пресвятой Богородице пред Ее иконою	37
«Урюпинская»	
Тропарь Божией Матери ради иконы Ее «Урюпинская»,	38
глас 3	
Кондак, глас 5	38
Величание	38

Молитва ко Пресвятой Богородице пред Ее иконою «Ярославская»	38
Тропарь, глас 4	38
Кондак, глас 6	39
Величание	39
9/22 июня	40
Молитвы преподобному Кириллу, игумену Болоезерскому	40
Молитва первая	40
Молитва вторая,	40
Тропарь преподобному Кириллу, игумену Белоезерскому, глас 1	41
Кондак, глас 8	41
Величание	41
Молитвы праведному Алексию Московскому	41
Молитва первая	41
Молитва вторая	41
Тропарь праведному Алексию Московскому, глас 4	42
Кондак, глас 4	42
Величание	42
10/23 июня	43
Молитвы святителю Василию, епископу Рязанскому	43
Молитва первая	43
Молитва вторая	43
Молитва третья	44
Тропарь святителю Василию, епископу Рязанскому, глас 4	44
Ин тропарь, глас 4	44
Кондак, глас 8	45
Величание	45
Молитва ко святой блаженной Любви Рязанской	45
Тропарь блаженной Любви Рязанской, глас 5	45
Кондак, глас 3	45
Величание	45
Молитва святителю Иоанну, митрополиту Тобольскому	46
Тропарь святителю Иоанну, митрополиту Тобольскому, глас 8	46
Кондак, глас 2	46
Величание	46
11/24 июня	47
Молитва преподобному Варнаве Ветлужскому,	47
Тропарь преподобному Варнаве Ветлужскому, глас 1	47
Кондак, глас 8	47
Величание	47
Молитвы преподобному Ефрему Новоторжскому	48
Молитва первая	48
Молитва вторая	48
Тропарь преподобному Ефрему, архимандриту Новоторжскому, глас 1	48
Кондак, глас 8	49
Величание	49

Молитвы ко Пресвятой Богородице пред Ее иконою «Достойно есть» («Милующая»)	49
Молитва первая	49
Молитва вторая	49
Молитва третья	50
Молитва четвертая,	50
Тропарь Божией Матери ради иконы Ее «Достойно есть» («Милующая»), глас 4	51
Ин тропарь, глас тойже	51
Кондак, глас 4	51
Ин кондак, глас 8	51
Величание	51
12/25 июня	52
Молитвы преподобному Онуфрию Великому, пустыннику	52
Молитва первая,	52
Молитва вторая	52
Молитва третья	53
Тропарь преподобному Онуфрию Великому, глас 1	53
Кондак, глас 3	53
Величание	53
Молитва общая преподобным Петру Афонскому и Онуфрию Великому	53
Тропарь преподобному Петру Афонскому, глас 4	54
Кондак, глас 2	54
Величание	54
Молитвы благоверной великой княгине Анне Кашинской	54
Молитва первая	54
Молитва вторая,	54
Тропарь благоверной княгине Анне, в иночестве Евфросинии, Кашинской, Тверской, глас 3	55
Ин тропарь, глас 4	55
Ин тропарь, глас 3	55
Кондак, глас 4	56
Ин кондак, на обретение мощей, глас 8	56
Величание	56
Молитвы преподобному Арсению Коневскому	56
Молитва первая	56
Молитва вторая	56
Тропарь преподобному Арсению Коневскому, глас 1	57
Ин тропарь, глас 4	57
Кондак, глас 8	57
Величание	57
Молитва преподобным Вассиану и Ионе Пертоминским, Соловецким чудотворцам	57
Конец ознакомительного фрагмента.	58

# **Помощь небесных покровителей. Полный сборник молитв на каждый день года (лето)**

© Олейникова Т.С., сост., 2009

© Издательство «ДАРЪ», 2009

## Предисловие

В данной книге собраны молитвы на праздники Господни, Богородичны, Небесных Сил бесплотных, святых угодников Божиих и икон Божией Матери в порядке церковного года, который начинается с сентября месяца. Даты указаны по старому (первая цифра) и новому (вторая цифра) стилю.

**Молитва** – это возношение ума и сердца к Богу, являемое благоговейным словом человека к Богу. Образцом для всех молитв или общей христианской молитвой является Молитва Господня «Отче наш», которой Господь наш Иисус Христос научил апостолов и которую они передали всем верующим.

*Молитва*, как золотой ключ, отверзает нам все сокровища милосердия и щедрот Божиих.

«*Молитва* – путь к Господу. Призовем имя Господа и спасемся. Молитва более всего дает благодать Духа Святого, потому что она всегда в руках наших как орудие для стяжания благодати Духа; двери молитвы открыты всем: и богатому, и бедному, и знатному, и простому, и сильному, и слабому, и здоровому, и больному, и праведнику, и грешнику. Особенно важно всегда держать в устах и в сердце молитву Иисусову: «Господи Иисусе Христе, Сыне Божий, помилуй мя грешного»... Сие непрестанно держи в устах и в сердце своем. С призыванием таким образом имени Божия ты найдешь покой, достигнешь чистоты духовной и телесной, и вселится в тебя Святой Дух, источник всех благ, и управит Он тебя во святые, во всяком благочестии и чистоте».

(Из наставлений преподобного Серафима Саровского.)

«*Молитва* есть одна из высших потребностей души человеческой, одна из существенных принадлежностей богопочитания. Душа, погруженная в чувственность, рассеянная, омраченная грехом, не чувствует, что по своему началу она есть дыхание уст Божиих. Но сила этого чувства без ее ведома возникает из ее глубины и движет сердце к Богу, хотя бы и к неведомому или только погрешительно знаемому. В наше время мы много хвалимся и не довольствуемся. А время советует меньше хвалиться и больше молиться. Сердца твоего требует Господь. Молитву Церковь влагает в уста, чтобы она проникла в сердце. Чтобы нищему принять милостыню, надобно ему протянуть руку; чтобы младенцу принять пищу, надобно ему открыть уста. Подобно сему надобно человеку простираться к Богу, чтобы достигнуть благодати Его, надобно иметь отверстую душу, чтобы принять дары Его. Молитва есть простертая рука для принятия благодати Божией, отверстые уста для вкушения пищи Небесной. Благодатный дух дарован молитве от Бога для помощи грешникам, восчувствовавшим и возненавидевшим свою греховность, решительно возжелавшим очищения и совершенного исправления, – тем, у кого недостает только силы делать добро, а не доброго намерения».

«Если хочешь, чтобы молитва твоя долетела до Бога, то дай ей два крыла: пост и милостыню».

(*Святитель Филарет, митрополит Московский и Коломенский.*)

*Молитвы* святых очень великую имеют силу, но когда и сами мы каемся и исправную являем жизнь. Если же сами не стараемся, то через других ничего не получим и не будем спасены. Бог более готов даровать нам потребное ради нашей молитвы, чем ради молитв других.

(*Святитель Иоанн Златоуст.*)

Кроме молитв, даны также тропари, кондаки и величания каждому угоднику Божию или празднику.

На некоторые дни года приходится память святых, которым нет молитв. В этих случаях им, кроме тропарей и кондаков, приведены икосы, стихиры, светилен, или седален.

**Тропарь** – краткая церковная песнь, в которой прославляются дела Бога или святых Его, т. е. песнопение, составленное в честь праздника или святого, в котором кратко выражается

сущность праздника или образ жизни святого и которое составляется и поется по известному образцу.

**Кондак** – краткая церковная песнь, в которой выражается в сжатом виде жизнь святого или история священного события.

**Величание** – хвала, прославление дел Бога или святых Его.

**Задостойник** – песнопение, которое поется в составе евхаристического канона вместо Богородичной песни «Достойно есть». На литургии Иоанна Златоуста в дни двенадесятых праздников и Пасхи (от дня праздника до дня отдания), а также на литургии Василия Великого в Великий Четверг и Великую Субботу задостойником является ирмос девятой песни канона утрени: в другие дни, когда совершается литургия Василия Великого, – особый Богородичный тропарь «О Тебе радуется».

*Это самое полное собрание молитв, тропарей, кондаков и величаний. Такого полного сборника еще не издавалось.*

Для работы были использованы Месяцесловы, Книги молебных пений, издаваемые в разное время, Минеи Месячные и другие богослужебные и церковные книги, отдельные частные службы, Жития святых с молитвами и т. д.

Составитель не ставил цели перечисления всех святых на каждый день всех месяцев года – их можно посмотреть в «Православном церковном календаре», а указаны только те святые угодники Божии, которым приводятся молитвы.

Если святому угоднику Божию или празднику в честь иконы Божией Матери не указана молитва, то в этом случае можно читать молитвы общие (см. раздел «Общие молитвы, тропари, кондаки и величания»)

## Июнь

### 1/14 июня

*Преподобного Дионисия, игумена Глушицкого (1437).*

*Преподобного Агапита Печерского, врача безмездного, в Ближних пещерах почивающего (XI).*

### Молитвы преподобному Дионисию Глушицкому

#### Молитва первая из акафиста

О священная главо, предивный подвижнице, преславный чудотворче, преподобне и богоносе отче Дионисие! К тебе прибегаем с верою и молимся с любовью от души: помолися за ны грешныя ко Господу Богу, Создателю и Промыслителю нашему, и испроси нам от Него великия и богатыя милости: здравие, благоденствие, земли плодоносие, воздуха благорастворение, мирное и безмятежное во благочестии житие, веры Православныя умножение, царствию Российскому утверждение, обители твоей святей благоустроение, и всем подвизающимся в ней и на поклонение приходящим милость Божию и спасение. И паки припадающе к тебе, яко чада твоя, отца нам суща, просим: святыми молитвами твоими приведи нас в тихое пристанище жизни вечныя, и сподоби нас житие сие временное благочестно и богоугодно скончати, мирную христианскую кончину получитьи и унаследовати Царствие Небесное, человеколюбием, благостию и милостию Отца и Сына и Святаго Духа, в Троице славимаго Бога, и твоим святым заступлением, во веки веков. Аминь.

#### Молитва вторая из акафиста

О великий Христов угодниче, святой и многомогущий наш предстателю и всея северныя Вологодския страны небесный покровителю, преподобне и преблаженне отче Дионисие! Ты на небеси престолу Пресвятыя Троицы со Ангелы предстоиши, zde же на земли, во всечестнем сем храме, святыми мощами твоими почиваеши, а данную ти свыше благодатию многоразличная совершаеши чудеса, недужным исцеления подавая: ты святыя и преподобныя ученики стяжал еси на месте сем, Амфилохия, Макария, Тарасия и Феодосия, с нимиже ныне радости нетленныя во обителях небесных наслаждаешися и на многомогущныя молитвы за нас грешных сия вкупе с тобою подвизаеши. Призри убо милостивно на предстоящия честней раце твоей люди, умиленно молящиеся и просящие от тебе помощи и заступления. Простри молитвенно ко Господу Богу преподобнии твои руце, и яко имеяй велие к Нему дерзновение, испроси нам от Него оставление согрешений наших вольных и невольных. В болезнях страждущим даруй исцеление, скорбящим утешение низпосли, бедствующим скорую помощь твою подаждь, всем же чтущим тя помилование и спасение и во всем благое поспешение исходатайствуй; да твоим святым предстательством получивше благодать и милость от Господа, Царствие Небесное унаследуем, и вкупе с тобою и со ученики твоими прославим великое человеколюбие Троицаго Бога, Отца и Сына и Святаго Духа, во веки веков. Аминь.

## **Молитва третья** *из акафиста*

О добрый наш пастырю и наставниче, святые обители сея приснопоминаемый первоначальниче и основателю, преподобне отче Дионисие! Памятуяще любовь твою ко учеником твоим и твое попечение о их душевном спасении, припадаем ти и молимся: помози и нам грешным, святыми молитвами твоими, покаянием очиститися от грехов наших и достойным явитися помилования и прощения от Господа и Создателя нашего. Соблуди предстательством твоим святую обитель твою и всю страну православнороссийскую невредимы от всякого зла, и вся люди, жительствующие во обители твоей и на поклонение к тебе приходящая во оную, осени небесным твоим благословением, и в скорбех, бедах и болезнях утешение, избавление и исцеление молитвенно им подаждь: да благодарно славим, хвалим и величаем Господа, дивнаго во святых Своих, чрез тебе нам благодетельствующаго и дивно в тебе прославляшагося, Отца и Сына и Святаго Духа, во веки веков. Аминь.

## **Тропарь преподобному Дионисию, игумену Глушицкому, глас 1**

Божественною любовию от юности распалюемъ, Дионисие преподобне, вся яже в мире красная возненавидев, Христа единого возлюбил еси, и сего ради во внутреннюю пустыню вселился еси, со зверьми живой, весь Христови. Отонудуже и Всевидающее Око, твоя труды видев, даром чудес и по преставлении обогатил тя есть. Темже вопием ти: моли непрестанно о всех нас, честную память твою присно в песнях почитающих.

## **Кондак, глас 8**

Все твое умное желание к Богу вперив, Тому невозвратно от души последовал еси, в пустыню вселився, и тамо ангельски пожив, многим путь был еси ко спасению, сего ради и Христос тебе прослави и даром чудес обогати. Темже вси вопием ти: радуйся, Дионисие преподобне, пустынный жителю.

## **Величание**

Ублажаем тя, преподобне отче Дионисие, и чтим святую память твою, наставниче монахов и собеседниче Ангелов.

## **Молитвы преподобному Агапиту Печерскому**

### **Молитва первая** *из акафиста*

Преподобне отче Агапите! Воззри на нас милостивно и к земли приверженных возведи к высоте небесней. Ты горе на небеси, мы на земли низу, удалены от тебе, не толико местом, елико грехми своими и беззаконии, но к тебе прибегаем и взываем: настави нас ходити путем твоим, вразуми и руководствуй. Вся твоя святая жизнь бысть зеркалом всякия добродетели. Не престани, угодниче Божий, о нас вопия ко Господу. Испроси предстательством своим у Всемилостиваго Бога нашего мир Церкви Его, под знамением Креста воинствующей, согласие в вере и единомудрие, суемудрия же и расколов истребление, утверждение во благих делах, больным исцеление, печальным утешение, обиженным заступление, бедствующим помощь. Не посрами

нас, к тебе с верою притекающих. Все православнии христиане, твоими чудесы исполненные и милостями благодетельствованные, исповедуют тя быти своего покровителя и заступника. Яви древняя милости твоя, и ихже отцем всепомоществовал еси, не отрини и нас, чад их, стопами их к тебе шествующих. Предстояще всечестней иконе твоей, яко тебе живу сушу, припадаем и молимся: приими моления наша и вознеси их на жертвенник благоутробия Божия, да приедем тобою благодать и благовременную в нуждах наших помощь. Укрепи наше малодушие и утверди нас в вере, да несомненно уповаем получитьи вся благая от благосердия Владыки молитвами твоими. О превеликий угодниче Божий! Всем нам, с верою притекающим к тебе, помози предстательством твоим ко Господу, и всех нас управи в мире и покаянии скончати живот наш и преселитися со упованием в блаженные недра Авраамова, идеже ты радостно во трудех и подвизах ныне почиваеши, прославляя со всеми святыми Бога, в Троице славимаго, Отца и Сына и Святаго Духа, ныне и присно и во веки веков. Аминь.

### **Молитва вторая** *из акафиста*

О священная главо, преподобне отче, преблаженне авво Агапите, не забуди убогих твоих до конца, но поминай нас всегда во святых твоих и благоприятных молитвах к Богу. Помяни стадо твое, еже сам упасл еси, и не забуди посещати чад твоих. Моли за ны, отче священный, за дети твоя духовныя, яко имеяй дерзновение к Небесному Царю, не премолчи за ны ко Господу, и не презри нас, верою и любовию чтущих тя. Поминай нас недостойных у престола Вседержителя, и не престай моляся о нас ко Христу Богу, ибо дана тебе бысть благодать за ны молитися. Не мним бо тя суща мертв, аще бо телом и преставился еси от нас, но и по смерти жив сый пребываеши. Не отступай от нас духом, сохраняя нас от стрел вражиих и всякия прелести бесовския и козней диавольских, пастырю наш добрый. Аще бо и мощей твоих рака пред очима нашими видима есть всегда, но святая твоя душа со ангельскими воинствы, со безплотными лики, с Небесными Силами, у престола Вседержителя предстоящи, достойно веселится. Ведуще убо тя воистину и по смерти жива суща, тебе припадаем и тебе молимся: молися о нас Всесильному Богу, о пользе душ наших, и испроси нам время на покаяние, да невозбранно прейдем от земли на небо, от мытарств же горьких, бесов воздушных князей и от вечныя муки да избавимся, и Небеснаго Царствия наследницы да будем со всеми праведными, от века угодившими Господу нашему Иисусу Христу, Ему же подобает всякая слава, честь и поклонение, со Безначальным Его Отцем и с Пресвятым и Благим и Животворящим Его Духом, ныне и присно и во веки веков. Аминь.

### **Молитва третья** *из акафиста*

О всеблаженне Агапите. Земный Ангеле и небесный человече! Припадаем к тебе с верою и любовию и молим ти ся прилежно: яви нам, смиренным и грешным, святое свое заступление; се бо грех ради наших не имамы свободы чад Божиих просити о потребах наших Господа и Владыку нашего, но тебе молитвенника благоприятнаго к Нему предлагаем и просим тя со усердием многим: испроси нам от благости Его благопотребныя дары душам и телесем нашим: веру праву, любовь ко всем нелицемерну, в злостраданиях терпение, тяжкими болезнями одержимым от недугов исцеление, под бременем скорбей и напастей неудобноносимых падающим и жития своего отчаявшимся – скорое облегчение и избавление сподоби.

Не забуди, блаженне отче, и обитель твою (*сию святую*), присно тя чтущую, но соблюди ю и всех живущих и подвижающихся в ней и на поклонение в ню приходящих невредимы от искушений диавольских и всякаго зла. Егда же приспеет наше от временнаго сего жития отше-

ствие и к вечности преселение, не лиши нас помощи твоея небесная, но молитвами твоими всех нас приведи в пристанище спасения и наследники нас быти всесветлаго Царствия Христова сподоби, да поем и славим неизреченныя щедроты человеколюбца Бога, Отца и Сына и Святаго Духа, и твое вкупе с преподобными Антонием и Феодосием отеческое заступление во веки веков. Аминь.

### **Молитва четвертая из акафиста**

О преподобне и богоносне отче наш Агапите! Слуго Божий преизряднейший, чудотворче и врачу всемилостивый, всем с верою и любовью тя призывающим скорый помощниче и теплый заступниче. Яко светильник пресветлый, ты просиял еси житием добродетельным в горах киевских на пажити Богоматери: темже припадающе к раце многоцелебных мощей твоих, со страхом покланяемся и любовью лобызаем, из глубины сердца к тебе взывая: помози нам, угодниче Божий, помяни нас пред Господем и испроси нам от него оставление согрешений наших вольных и невольных, в недугах страждущим скорое исцеление подаждь, путешествующим заступление, скорбящим утешение, бедствующим помощь и избавление и вся потребная ко спасению. Яко да твоими, отче, святыми молитвами получивше благодать и милость от Всемиловитаго Спаса и Господа нашего Иисуса Христа, возвеличим и прославим препетое имя Его, Емуже со Отцем и Святым Духом слава и держава во веки. Аминь.

### **Тропарь преподобному Агапиту Печерскому, глас 5**

Богоноснаго Антония ревнуя смиренномудрию, аки неким врачевством зелием снадным исцелял еси болящия, преподобне Агапите, тем и врача неверна уверив, наставил еси на путь спасения. Уврачуй и наша болезни и молися Господеву о воспевающих тя.

### **Ин тропарь, глас 2**

Велия веры исправления, в пещерном затворе, яко на воде упокоения, преподобне отче Агапите, радовался еси, огнем бо любви Божественныя распалаемь, бдением и молитвою безстрастия достигл еси, и явился еси равноангельный на земли, того молитвами, Христе Боже, спаси души наша.

### **Кондак, глас 6**

Врач сый изряден, чудне, являя несумненную твою веру, обличая же армениново неверие и приводя его к благочестию, себе, близ смерти бывшу, испросил еси от Бога продолжение живота и, сим чудом того уверив, привел еси Христови. Емуже в веселии предстоя, молися о нас, преподобне.

### **Величание**

Ублажаем тя, преподобне отче Агапите, и чтим святую память твою, наставниче монахов и собеседниче Ангелов.

*Преподобному Агапиту Печерскому, врачу безмездному, молятся о помощи при болезненном состоянии, об исцелении от разных недугов и болезней.*

## **2/15 июня**

*Великомученика Иоанна Нового, Сочавского (1330–1340).*

*Обретение мощей праведной Иулиании, княгини Вяземской, Новоторжской (1819).*

### **Молитвы великомученику Иоанну Новому, Сочавскому**

#### **Молитва первая**

##### ***из молитвослова***

О святой угодниче Божий, Иоанне! Подвигом добрым подвизався на земли, восприял еси на Небесех венец правды, егоже уготовал есть Господь всем любящим Его. Темже взирающе на святой твой образ, радуемся о преславнем скончании жительства твоего и чтем святую память твою. Ты же, предстоя престолу Божию, приими моления наша и ко Всемилостивому Богу принеси, о еже простити нам всякое прегрешение и помощи нам стати противу кознем диавольским, да избавимся от скорбей, болезней, бед и напастей и всякого зла, благочестно и праведно проживем в нынешнем веке и сподобимся предстательством твоим, аще и недостойны есмы, видети благая на земли живых, славяще Единого во святых Своих славимаго Бога, Отца и Сына и Святого Духа, ныне и во веки веков. Аминь.

#### **Молитва вторая**

##### ***из акафиста***

Святой, славный и всехвальный великомучениче Христов Иоанне, несумненный ходатаю нашего спасения. Молим тя раби твои, собрании днесь в Божественном твоём храме и раце святых мощей поклоняющиеся; милостив буди якоже нам, тако и далече отстоящим и на помощь ты призывающим и мученические твои страдания похвалами ублажающим. Испроси нам всем у многомилостиваго Господа Бога и Спаса нашего Иисуса Христа прощения и оставления грехов, до сего дне и часа содеянных нами. Сохрани нас невредимых от всех козней лукаваго и ненаветну жизнь нашу соблюди от всех зол душевных и телесных, всегда, ныне и присно и во веки веков. Аминь.

#### **Молитва третья**

##### ***из молитвослова***

Святой мучениче Иоанне! Призри с небеснаго чертога на требующих твоея помощи и не отвергни прошений наших, но, яко присный благодетель и ходатай наш, моли Христа Бога, да человеколюбив и многомилостив сый, сохранит нас от всякаго лютаго обстояния: от труса, потопа, огня, меча, нашествия иноплемеников и междоусобных брани. Да не осудит нас, грешных, по беззакониям нашим, и да не во зло обратим благая, даруемая нам от Всещедраго Бога, но во славу святаго имени Его и в прославление крепкаго твоего заступления. Да молитвами твоими даст нам Господь мир помыслов, воздержание от пагубных страстей и от всякия скверны и да укрепит во всем мире Свою Единую Святую Соборную и Апостольскую Церковь, юже стяжал есть честною Своею Кровию. Моли прилежно, святой мучениче, да благословит Христос Бог державу Российскую, да утвердит во Святей Своей Православней Церкви живой дух правая веры и благочестия, да вси члены ея, чистии от суемудрия и суеверия, духом и истиною поклоняются Ему и усердно пекутся о соблюдении Его заповедей, да мы вси в мире

и благочестии поживем в настоящем веке и достигнем блаженных вечных жизни на небеси, благодатию Господа нашего Иисуса Христа, Ему же подобает всякая слава, честь и держава со Отцем и Святым Духом, ныне и присно и во веки веков. Аминь.

## **Тропарь великомученику Иоанну Новому, Сочавскому, глас 4**

Житие на земли добре окормляя, страдальче, милостынями, и частыми молитвами, и слезами, паки же ко страданию мужески устремився, персское обличил еси нечестие. Темже Церкви был еси утверждение и христиан похвало, Иоанне приснопамятне.

## **Кондак, глас тойже**

Морскую плавая пучину куплюю, от востока тщался еси к северу, но Богу призвавшу тя, якоже Матфей мытницу, ты же куплю оставль и Тому последовал еси кровию мучения, временными испутив непроходима, и венец приял еси непобедимый.

## **Величание**

Величаем тя, страстотерпче святой Иоанне, и чтим честная страдания твоя, яже за Христа претерпел еси.

*Великомученику Иоанну Новому, Сочавскому, молятся о благоуспешной торговле.*

## **Молитва благоверной княгине Иулиании Вяземской, Новоторжской, чтомая в Новоторжском Преображенском соборе Тверской епархии**

О блаженная госпоже, преславная Христова мученице, Небесных Ангелов сожительнице, благоверная княгине Иулиание, добре за чистоту подвизавшаяся, ея же ради и Божественными дарами обогатившаяся, во временной жизни люте от злокозненного врага пострадавшая, утешение же некончаемое от Христа Бога получившая, благими делы и кротостию украсившаяся и кротких землю наследовавшая, благочестно в законе пожившая и вельми ныне чудесы просиявшая! Ты, яже чистоты ради твоея сердечныя, прияла в тя Свет Святого Духа и была еси всех благих дел сокровище на земли и, сего ради благий конец мученичества улучивши, неизреченного света сподоблена еси в вечных кровех Небесного селения. Ты, яже со святыми соборы водворяеши и с мученик лики веселишися, помяни и нас, добродетельное твое житие и страдания твоя мученическая похваляющих и с духовною радостью почитающих твою память. Призри на ны, волнами житейскими обуреваемая, да твоими молитвами, добре поживше, диавольских избежим сетей и с тобою вечных благ сподоблены будем. О всеблаженная страстотерпице, всех Владыце и Богу благая и верная рабо явившаяся! Днесь, собрании в храме твоём, к мощем твоим припадающе, умиленно вопием и молим тя: моли с нами и о нас умоляемого от своего благоутробия Бога, да милостивно услышит нас, просящих Его благостыню, и подаст нам вся, яже ко спасению и житию нужная прошения, и всем, на всяком месте, во всякой скорби и обстоянии требующим Его человеколюбия и помощи, великую Свою милость. Да благодатию Божиею и твоим теплым ходатайством здрави всегда душею и телом пребывающе, славим дивного во святых Своих Бога Израилева, не удаляющего помощи Своея от нас всегда, ныне и присно и во веки веков. Аминь.

## **Тропарь благоверной княгине Иулиании Вяземской, Новоторжской, глас 2**

Благочестно в законе поживши и благими дела украсившись, яко крепкий адамант явилася еси, целомудренная святая благоверная княгине Иулиание: тленную бо славу и добротство телесное презревши, злокозненного врага победила еси и целомудрия ради мученическую смерть прияла еси. Сего ради от Христа Бога нетленным и вечным венцем венчавшись, ныне с лики мученик ликуеши, и нам велия чудеса, приходящим ко гробу твоему, обильно источаеши. Темже ти вопием: молися Христу Богу о всех нас, с верою и любовью страдания твоя почитающих.

## **Кондак, глас тойже**

Воспоем днесь Благодетеля всех Бога, прославлянаго в России Иулианию богомудрую, да молитвами ея подаст душам нашим грехов оставление и велию милость.

## **Величание**

Величаем тя, святая благоверная княгине Иулиание, и чтим святую память твою, ты бо молиши за нас Христа Бога нашего.

## **3/16 июня**

*Перенесение мощей благоверного царевича Димитрия из Углича в Москву (1606).  
Сретение в Вологде образа преподобного Димитрия Прилуцкого, Вологодского чудотворца (1503).  
Югской иконы Божией Матери (1615).*

### **Молитвы благоверному царевичу Димитрию Угличскому и Московскому, чудотворцу**

#### **Молитва первая** *из древней рукописи*

О святой мучениче, благоверный царевичу и княже Димитрие!

Яко агнец незлобив от раба заколенный, венцем царским от Господа венчался еси, и сын царев быв, мученик непобедим явился еси, и вместо земных и тленных на Небеси нетленное восприял еси. И ныне предстои в радости Святей Троице, посещай творящая верно твою светоносную память: соблюдай отечество твое и град твой невредим, тому бо еси утверждение: утверди православных жительство в мире глубоце: междоусобную брань укроти: и вся полезная даруй всегда людям твоим молитвами твоими, да верою и любовью вопием ти: радуйся, святе Димитрие, верных людей теплый заступниче и прибежище и земли Российския украшение. Аминь.

#### **Молитва вторая** *из древней рукописи*

О преславный и дивный в чудесех, красото мучеников, страстотерпче царевичу княже Димитрие, скоро предстани Небесному Царю и мученические твои руце о нас грешных молебне к Нему простри, яко имея дерзновение велико; сохрани же твоими молитвами град сей и вся грады и веси православные, и Святейшего Патриарха (*имярек*) и преосвященные митрополиты, архиепископы, епископы и весь священный чин церковный, и в палате всю братию нашу, и вся православныя Христианы; всех нас приими во твое заступление, и от всех бед и зол избавляя, и от нашествия видимых и невидимых борющихся нас врагов свободя, и тех всяк навет и злохитрство погубляя и отгоняя; таже прегрешений наших прощение испроси, и во век будущий Небеснаго Царствия нас сподоби, и спасенных Богу представи, благодатию и человеколюбием Господа и Спаса нашего Иисуса Христа, Ему же честь и поклонение подобает, ныне и присно и во веки веков. Аминь.

#### **Молитва третья** *из древней рукописи*

О великий и милостивый страстотерпче, царевичу княже Димитрие! Услыши нас грешных моление со усердием тебе приносящих, и помози нам в жизни сей, от грехов, бед и скорбей избавляя, и в будущем веке буди помощник и заступник, от мучений адových свободя и сподобляя купно с тобою поклоняться и воспевати Всесвятую Троицу, Отца и Сына и Святаго Духа, ныне и присно и во веки веков. Аминь.

## **Тропарь благоверному царевичу Димитрию Угличскому и Московскому, глас 4**

Царскую диадиму обагрив еси кровию своею, богомудре мучениче, за скиптр Крест в руку приим, явился еси победоносец и жертву непорочну Владыце принесл еси себе: яко бо агнец незлобив, от раба заколен еси. И ныне, радуясь, предстоиши Святей Троице, молися о державе сродников твоих богоугодней быти и сыновом российским спастися.

### **Ин тропарь, глас 2**

Яко благочестиваго корене боголюбивый произыде плод, яко агня незлобиво, неповинно во младенчестве заклан бысть от властолюбца вкупе и злаго раба. Тем, яко златыми крылы, душевною чистотою и младенческим незлобием к Небесней высоте возлетел еси, страстотерпче Димитрие. И ныне кровь твоя от земли тайно вопиет к Богу, яко Авеля праведнаго. Сего ради покланяемся верою ти, славяще прославльнаго тя Бога, Егоже моли стране нашей богоугодней быти и сыновом русским спастися.

### **Ин тропарь, глас 1**

Всеоружеством Духа благодати вооружен был в необорим столп и утверждение отечеству своему показася, яко агнец незлобивый, от врага несправедно заклан был и в жертву непорочну Господеву принесен. И ныне дар благодати от всех Подвигоположника прием, источаеши всем исцеление, достохвальне благоверный царевичу княже Димитрие. Слава Восприимшему тя от земных в Небесная, слава Действующему тобою всем исцеление.

### **Ин тропарь, глас 3**

Днесь вельми хвалится царствующий град Москва, имея в себе праведныя твоя мощи, благоверне царевичу Димитрие, яко цвети благоуханныи, пребываеши во святем храме, просвещение подают душам и телом нашим. Тем радостно тя восхваляем, и честное пренесение мощей твоих верно почитаем, и молим тя: моли Христа Бога даровати нам велию милость.

### **Ин тропарь, глас 2**

Яко благочестиваго царскаго корене боголюбивый произыде плод, яко агня незлобиво, неповинно во младенчестве заклан бысть от властолюбца, вкупе же и от злаго раба, тем яко златыми крылы душевною чистотою и младенческим незлобием к Небесней высоте возлетел еси, Димитрие, и ныне кровь твоя от земли тайно вопиет к Богу, яко Авеля праведнаго, и сего ради покланяемся верою твоих мощей раце, из неяже реки чудес изливаеши приходящим ти с верою и любовию целующим многоцелебныя твоя мощи, славящим прославльшаго тя Бога, Егоже моли, державный страстотерпче Димитрие, православным сыновом русским спастися.

## **Кондак, глас 8**

Возсия днесь в славней памяти твоей верным веселие яко бо доброрасленный грезн прозябл еси и Христу красен плод принесл еси; темже и по убиении твоем соблюди тело твое нетленно, страдальчески обогрив кровию. Благородне святе Димитрие, соблюдай отечество твое и град твой невредим, тому бо еси утверждение.

## **Ин кондак, глас 8**

Светило пресветлое явися днесь божественная память твоя; богодарованная ти чудеса, яко реки, от всяких многоразличных недуг подаеши исцеление с верою призывающим тя, созывая нас к похвалению прославляющего тя Бога. Егоже моли, страстотерпче Димитрие, мир мирови даровати, от видимых и невидимых враг православныя люди невредимы сохранить, да зовем ти: радуйся, ты бо еси утверждение граду нашему.

## **Ин кондак, глас 4**

Яко пресветлая звезда явился еси днесь в царствующем граде Москве, благоверне царевиче Димитрие, сияя праведными своими мощами. К нимже притекающе, исцеления дар приемлем и глаголем: радуйся, всекрасне душею, благородне Димитрие, яко приял еси от Бога велий сей дар и венец нетленный.

## **Величание**

Величаем тя, святой благоверный царевиче Димитрие, и чтим святую память твою, ты бо молиши за нас Христа Бога нашего.

*Благоверному царевичу Димитрию, Угличскому и Московскому, молятся о прозрении слепых очей.*

## **Молитва преподобному Димитрию Прилуцкому, Вологодскому из акафиста**

О священная главо, предивный чудотворче, преподобие и богоносне отче наш Димитрие! Усердно припадающе к тебе, молимся: яви нам, смиренным и грешным, многомощное твое заступление. Се бо грех ради наших не имамы дерзновения ко Господу, просити Его даров, нам благопотребных, **но** тебе, молитвенника к Нему благоприятного, предлагаем и просим: испроси нам у благодати Его вся, яже на пользу душам и телесем нашим: веру праву, надежду несомненну любовь нелицемерну, во искушениях мужество, в злостраданиях терпение, в молитвах постоянство, в благочестии преуспеяние, вожденное здравие, земли плодоносие, воздуха благорастворение, дожди благовременны, житейских потреб довольство, мир во днех наших и благословение свыше на вся благая дела и начинания наша, и да не во зло обратим дары Его, но в славу имени Его святого и в прославление твоего о нас ходатайства. Испроси, угодниче Христов, у Царя царствующих и Господа господствующих стране нашей Российстей тишину и благоустройство. Не забуди, чудотворче святой, милостивно присещати град твой и обитель твою, и вся грады и веси страны нашея православныя, сохраняя и соблюдая их молитвами твоими от всякого зла. Помяни всех, веру и любовь к тебе имущих, имя твое молитвенно призывающих и на поклонение мощам твоим святым приходящих и вся во благих прошения их милостиво исполни, осеняя их свыше святоотеческим твоим благословением. Ей, святче Божий! Не лиши и нас грешных твоего многомощного заступления, но сподоби нас кончину жития благую улучшить и Царствие Небесное унаследити: да воспоем и прославим дивнаго во святых Своих Бога нашего, Отца и Сына и Святаго Духа, во веки веков. Аминь.

## **Тропарь преподобному Димитрию Прилуцкому, Вологодскому чудотворцу, ради сретения его образа в Вологде, глас 4**

Возсия днесь, яко солнце, пречестный образ священнолепного твоего подобия, паче солнца лучами чудес твоих всех озаряя, тьму бесовскую без вести творя, егоже радостно среташу, духовныя лики составльше, непрестанно вопием ти: Димитрие, отче наш, моли Спаса всех сохранить град твой и страну нашу, стаду твоему спасение подавая и велию милость.

## **Кондак, глас 8**

Христа единого в жизни сей во след идти возжелал еси и, Того любовию земная отринув, преминув Небесными, с лики Ангел водворяясь, неотступно предстоиши Богови, тем и ныне пресвятому твоему образу сретения праздник радостно сотворяюще, от недуг исцеление приемлем, благодарно вопиюще: радуйся, преподобне отче Димитрие, постников удобрение.

## **Величание**

Ублажаем тя, преподобне отче Димитрие, и чтим святую память твою, наставниче монахов и собеседниче Ангелов.

## **Молитва ко Пресвятой Богородице пред Ее иконою «Югская»**

К Тебе, Пречистой Божией Матери, аз окаянный припадая молюся: веси, Царице, яко непрестанно согрешаю и прогневаю Сына Твоего и Бога моего. И аще многажды каюся, ложь пред Богом обретаюся: каюся трепеща, да не како поразит мя Господь, и по часе мале паки таяжде творю. Ведущи сия, Владычице моя, Госпоже Богородице, молю, да помилуеши, да укрепиши мя, и благая творити да подаси ми. Ты веси, о Владычице моя Богородице, яко имам в совершенней ненависти злая моя дела и всею мыслию люблю закон Бога моего. Но не вем, Госпоже Пречистая, откуда яже ненавижду, тая творю, а благая престаю. Не попускай убо, Пречистая, воли моей совершатися, неужгодна бо есть, но да будет во мне воля Сына Твоего и Бога моего, да мя спасет, и вразумит, и подаст ми благодать Святаго Духа, да бых аз отселе престал сквернодействуя и прочее пожил бых в повелениях Сына Твоего, Господа нашего Иисуса Христа, Емуже подобает всякая слава, честь и поклонение, со Безначальным Его Отцем, и Пресвятым и Благим и Животворящим Его Духом, ныне и присно и во веки веков. Аминь.

## **Тропарь Божией Матери ради иконы Ее «Югская», глас 6**

Днесь, яко солнце пресветлое, возсия нам на воздухе Всечестная икона Твоя, Владычице, лучами милости мир просвещаючи, юже великая Россия, яко некий дар Божественный, свыше благоговейне восприемши, прославляет Тя, Богомати, всех Владычицу, и от Тебе рождшагося Христа Бога нашего величает радостно. Емуже молися, о Госпоже Царице Богородице, да сохранит вся грады и страны христианския невредимы от всех навет вражиих и спасет верою поклоняющихся Его Божественному и Твоему Пречистому образу, Дево Неискусобрачная.

## **Кондак, глас 8**

Притецем, людие, к Деве и Богородице Царице, благодаряще Христа Бога нашего, и, к Той чудотворней иконе умильно взирающе, припадем и возопием Ей: о Владычице Марие, при-

сетивши страну сию Твоего честного образа явлением чудесно, спасай в мире и благовременстве страну нашу, и вся христиане, наследники показующи Небесная жизни, Тебе бо, верно зовем: радуйся, Дево, миру спасение.

## **Величание**

Величаем Тя, Пресвятая Дево, Мати Христа Бога нашего, и чтим образ Твой святыи, от негоже источаеши исцеления всем, с верою к Тебе притекающим.

*Пред иконой Пресвятой Богородицы «Югская» молятся об исцелении различных недугов и болезней.*

## **4/17 июня**

*Преподобного Мефодия, игумена Пешношского (1392).*

*Праведных Марфы и Марии, сестер праведного Лазаря (I).*

### **Молитвы преподобному Мефодию, игумену Пешношскому**

#### **Молитва первая** *из службы с акафистом*

О священная главо, земный ангеле и небесный человеце, преподобне и богоносе отче наш Мефодие! Припадаем к тебе с верою и любовию, и молимся прилежно: яви нам, смиренным и грешным, святое отеческое твое заступление: се бо грех ради наших не имамы свободы чад Божиих просити о потребах наших Господа и Владыку нашего, но тебе, молитвенника благоприятного к Нему предлагаем и просим тя со усердием многим, испроси нам у благодати Его благопотребныя дары душам и телесем нашим: веру праву, надежду спасения несомненну, любовь ко всем нелицемерну, в искушениях мужество, в злостраданиях терпение, в молитвах постоянство, душ и телес здравие, земли плодоносие, воздуха благорастворение, житейских потреб довольство, мирное и безмятежное житие, благу христианскую кончину и добрый ответ на Страшном Суде Христове. Не забуди, святче Божий, и обитель твою святую, тобою созданную и присно ты чтущую, но соблюди ю и всех живущих и подвижающихся в ней и на поклонение в ню приходящих невредимыми от искушений диавольских и всякого зла. Ей, преподобне отче! Не лиши нас помощи твоея небесная, но молитвами твоими всех нас приведи в пристанище спасения и наследники яви нас быти всесветлаго Царствия Христова: да поем и славим неизреченныя щедроты человеколюбца Бога, Отца и Сына и Святаго Духа и твое святое отеческое заступление во веки веков. Аминь.

#### **Молитва вторая** *из службы с акафистом*

О великий угодниче Христов и преславный чудотворче, преподобне отче наш Мефодие! Призри на ны грешныя, обуреваемая треволением житейских страстей и к тебе вопиющия: мы бо, чада твоя духовная и ограды твоея словесныя овцы, на тя по Бозе и Богородице упование наше возлагаем, и тя со умилением просим: твоим ходатайством ко Господу Богу испроси нам мир, здравие, долгоденствие, воздуха благорастворение, земли плодоносие, дожди благовременны, и вся ны избави от всяких бед: града, потопа, огня, меча, вредоносного червья, снедающего плоды земныя, тлетворных ветров, смертоносныя язвы и нечаянныя смерти, и во всяких скорбех и печалех наших буди нам утешитель благий и помощник скорый, сохраняя нас молитвами твоими от падений греховных и сподобляя наследники быти Царствия Небеснаго; да прославляем вкупе с тобою всех благ Подателя, в Троице славимаго и покланяемаго Бога, Отца и Сына и Святаго Духа, во веки веков. Аминь.

#### **Тропарь преподобному Мефодию, игумену Пешношскому, глас 8**

Божественною любовию от юности распалюемъ, вся яже в мире красная возненавидев,  
Христа единого возлюбил еси, и сего ради в пустыню вселився, в ней обитель сотворил еси,

и собрав иноков множество, приял еси от Бога чудес дар, отче Мефодие, и был еси о Христе собеседник и спостник преподобному Сергию, с нимже у Христа Бога испроси православным христианом здравие и спасение, и душам нашим велию милость.

### **Кондак, глас 4**

Послушания добрый рачитель быв, безплотныя враги слезными молитвами твоими крепко посрамил еси и явился еси Пресвятыя Троицы жилище, Юже зря, блаженне, ясно, Богомудре Мефодие преподобне, чудес дар от Нея приял еси. Темже исцеляеши с верою приходящих недуги, утоляеши скорби и молишися непрестанно о всех нас.

### **Величание**

Ублажаем тя, преподобне отче Мефодие, и чтим святую память твою, наставниче монахов и собеседниче Ангелов.

## **Молитвы праведным Марфе и Марии, сестрам праведного Лазаря**

### **Молитва первая *из службы с акафистом***

О святые и всехвальныя ученицы Христовы, Боголюбивыя Марфо и Марие! Умолите возлюбленного вами и вас возлюбившаго Сладчайшаго Иисуса, Егоже вы исповедали есте, Христа, Сына Божия, да даст и нам, грешным, грехов оставление, в вере правой нелицемерное и твердое стояние. Вселите в сердца наша дух страха Божия, смиренного на Бога упования, терпения и к ближним милосердия. Избавите нас молитвами вашими от искушений житейских, бед и напастей, да, тихое и мирное житие поживше zde, с помыслы непорочными и сердцем чистым, с дерзновением веры и упования предстанем на оный страшный суд и, добрый ответ на нем воздавше, радости вечныя в Царствии Небеснем сподобимся. Аминь.

### **Молитва вторая, единыя жены молящияся, наипаче в келии наедине чтомая *из службы***

О блаженныя и святые жены, верою и любовью Христу Богу последовавшия и во обители Отца Небеснаго вселившияся! К вам ныне аз, грешная, прибегаю и смиренно молю: научите мя и помозите ми ходити пред Богом путми вашими непреткновенно и вечную купно с вами жизнь наследовати.

О Марфо праведная, твердым исповеданием веры твоя Христу угодившая, укрепи слабую веру мою. О службе Господу и братьям нелицемерне и всеусердне прилежавшая, помози и мне служение мое безропотне и вседушевно проходить. Сестру твою иногда, в скорби сушу, ко Христу воззвала еси, отай рекши: Учитель пришел есть и глашает тя. Ныне убо предстани мне в трудный час испытания веры и любви моя и в глубине сердца возвести ми, яко Господь Иисус незримо грядет, да путем испытаний привлечет мя к Себе! Испроси мне, о мати святая, у Господа нашего силу и крепость, да, вставши скоро притеку к Нему, поклонюся Ему и в смиренной любви Его мир и спасение души обрящу.

И ты, о Боголюбивая Марие, у ногу Иисусову единое на потребу обретшая, помолися Ему благую часть спасаемых и мне, грешней, улучшить. Мире благовонное в дар благодарения Христу Жизнодавцу принесшая, умоли ныне Его и души моей подати миро молитвы и покаяния слезы, чистоты и добрых дел благоухание, тако да во обновленное всеми сими сердце мое Господь приидет и обитель Себе сотворит.

К вам, о святые праведныя жены, Марфо и Марие, припадаю и смиренно молю: не оставите мя в дни тяжких испытаний, да не соблазнюся тленными и красными мира сего, наипаче же в час горький разлучения души моея с телом предстаните мне и общего Владыку нашего умолите, да призрит на мя в оскудении сил моих милостивым оком и, простив вся прегрешения моя, возставит мя к жизни нескончаемой в блаженных обителях Отца Небесного. Аминь.

### **Тропарь праведным Марфе и Марии, сестрам праведного Лазаря, глас 3**

Праведного Лазаря Боголюбивыя сестры, Марфо и Марие преславныя, чистым сердцем Христа в житии вашем возлюбили есте, мироносиц взявше чин, и Его, яко Сына Божия, безбоязненно исповедали есте, сего ради ныне во обителях Отца Небесного со Ангелы и всеми святыми славно царствуете. Умолите, Егоже возлюбили есте, и нам, грешным, в вере и любви Христовой утвердиться и Царствия Небесного сподобиться.

### **Величание**

Величаем вас, святые праведнии Марфо и Марие, и чтим святую память вашу, вы бо молитесь о нас Христа Бога нашего.

## 5/18 июня

*Благоверного князя Феодора Ярославича (брата святого Александра Невского), Новгородского (1233).*

*Обретение мощей преподобных Вассиана и Ионы Пертоминских, Соловецких чудотворцев (1599).*

### **Молитва благоверному князю Феодору Новгородскому из службы**

Святый благоверный великий княже Феодоре! Ты от княжеския крове происшед в мир сей, княжескую славу навсегда имел еси наследовати, и вся красная мира сего быша в руку твою, егда на земли сей обитал еси. Но ты, еще и в младых летех скончался еси, но исполнил еси лета долга и душевнаго сопостата, еще млад сый, победити в силах был еси. И чистоту в житии твоём соблюл еси, чесо ради крепкий во бранех Господь и причте тя, яко добраго воина, к Безплотному Своему воинству в Небесных обителях, Россию же защити рукою брата твоего, святого благовернаго великаго князя Александра Невского. Сего ради молим тя, небесный воине Христов: даждь и нам познати, сколь ничтожно и преходяще все житейское и сколь близок всегда должен быти сердцу нашему Бог наш, да выну помышляем о Горнем, не о земном, да неусыпно ищем вечнаго Небеснаго отечества, да прославляем Бога жизнью и делами нашими и с мужеством отражаем стрелы похоти, греха и соблазнов. Ты из среды волнующагося душевных страстей моря к тихому пристанищу в краткое время безбедно достигл еси, и, еще устремляхуся мира сего волны, еже потопити невинную юность твою, но ничтоже успеха, ковчег бо тебе бысть чистота, кормило – Православная вера, котва – твердая на Бога надежда, ветрило – любовь к Богу и ближнему. Молим тя, угодниче Божий, усвой и нам эти свойства своя и добродетели, охлаждай похоти сердца нашего, помогай нам в борьбе со страстями нашими, исходатайствуй нам у Господа решительное отвращение от пороков, постоянство в добродетели, терпение в бедствиях, великодушие в горестех, твердую на Бога надежду во всех обстоятельствах настоящая жизни, любовь к врагом, желание добра всем, любящим и ненавидящим нас. Ты, уверен быв, яко златотканная ризы общему подлежат тлению, потщался еси в животе твоём из добродетелей исткати себе ризу нетления, в нейже ныне красуешься, внуши и нам, да отвращаемся от всех мирских удовольствий, от всякия плотския похоти, от всея земная славы и от всякаго тленнаго сокровища, да презираем обольщение роскоши, и гнушаемся обаяния лести и порока, и да радуемся, егда терпим за Христа лишения, уничижения, гонения, презрения, клевету и озлобление. Горяху к тебе, святой княже, любовью российския сынове, видяще тя, от благочестиваго кореня отрасль благочестивую, и великолепный брак тебе на земли готовляху сродницы и друзи твои, не ведуще Божия Промысла, яко Бог благоволил избрати, во еже тебе безбрачну служити на браце Сына Его Единороднаго, и ты, святой благоверный княже, предварив нас в Царстве благодати, привлецы и нас своею любовью в Царство Небесное, буди для нас орудием человеколюбия и благодати Божией, отклоняй от нас истинная бедствия, утешай нас в горестех и печалех, укрепляй своим предстательством у Господа силы верныя на добродетель во славу имени Божия и в преспеяние Царства Христова, да процветают здравием к благоденствию и возрастают от силы в силу и от славы в славу вси народи земли Российския, да будут всегда одушевлены благочестием, правдою, мужеством, преданностию отечеству и всеми добродетельми, да и мы вместе с тобою удостоимся превозносить благодать, любовь и милосердие Единого, в Троице Святей славимаго Бога, Отца и Сына и Духа Святаго, ныне и присно и во веки веков. Аминь.

## **Тропарь благоверному князю Феодору Ярославичу, брату благоверного князя Александра Невского, Новгородскому, глас 8**

От благочестиваго корене отрасль благочестивая прозябл еси, скончався в юности, лета долга твоими добродетельми исполнил еси, благоверный Феодоре, сего ради Владеющему временами молимся, да молитвами твоими подаст нам долготу лет и низпослет стране нашей велию и богатую милость.

## **Кондак, глас 4**

В благочестии рожденна, в страхе Божии воспитана, в житии целомудрие стяжавшаго, по успении же нетлением телесе просиявшаго, благовернаго Феодора во святых почитая, смиренно молимся Тебе, Всесильный Владыко, да и во веки прославляеши святыми Твоими страны наша российския.

## **Величание**

Величаем тя, благоверный Феодоре, и чтим святую память твою, ты бо молиши за нас Христа Бога нашего.

## **Молитва преподобным Вассиану и Ионе Пертоминским, Соловецким чудотворцам *из службы***

О преподобнии и всечестнии отцы Вассиане и Ионо, угодницы Христовы блаженнии и чудотворцы преславнии! Постничеством Богу первее угодивше и дела благочестно на земли подвизавшеся, яко светила светлая, по смерти в мире возсиявше, просвещающе верных чудес светлостию, вы заступницы теплии покажетесь. Многих, в скорбех и бедах страждущих и погибнути имущих, здравы сохраните, непослушавших же заветы вашего и маловерующих отмстительне накажете, и прежде заблуждшей жене путевожди бысте, и ослепшему паки прозрение дароваше. Дерзостне же коснувшася целебных мощей ваших напрасно отринувши и, разслаблением наказавше, помиловаше. К сим же и иная преславная соделаше, и бывшее оскудение во обители вашей сугубо исполните, соблюдаяще ю. Молимся убо ныне вам, о преблаженнии отцы, услышите моление наше, не презрите нас в бедах и скорбех, призывающих вас верою, будите помощники нам скории и покровители, сохраните же во благоденствии, мире и тишине отечество наше. К сим же и духовнаго о вас собрания не оставите до конца, посещающе я всегда, о преподобнии, изобилуянием всяцем, и молитесь присно о нас ко Господу, да молитвами вашими грехов прощение получим, и Царствия Небеснаго сподобимся благодатию Его, яко Тому подобает всякая слава, честь и поклонение, ныне и присно и во веки веков. Аминь.

## **Тропарь преподобным Вассиану и Ионе Пертоминским, Соловецким, глас 8**

Прежде отвержением мира, яко морскаго треволнения, избегосте, отцы преподобнии, послежде же изволением Божиим в водах морских кончину блаженную приясте и к неболез-

ненному покою преставистесь от земли радующеся. Тем и по кончине от Христа Бога прославистесь чудесы обильно, теплии в бедах верным помощницы показастесь. И ныне на Небесех предстояще престолу Христову, Вассиане преблаженне и Ионо преславне, молитесь присно о душах наших.

## **Кондак, глас 2**

Яко сокровище богато, верным Божественная благодать из морских недр издаде мощи ваша, отцы преблаженнии, и в месте пусте целы и невредимы обретошася преславно, и тако вас ради ныне славится Бог, Емуже со дерзновением предстояще ныне на Небесех, Вассиане и Ионо досточуднии, молитесь непрестанно о всех нас.

## **Величание**

Ублажаем вас, преподобнии отцы Вассиане и Ионо, и чтим святую память вашу, наставницы монахов и собеседницы Ангелов.

## **6/19 июня**

*Преподобного Паисия Угличского (1504).*

*Преподобного Ионы Климецкого (Клименецкого), Олонецкого (1534).*

### **Молитва преподобному Паисию Угличскому, юже творяше братия Покровской обители из службы**

О преподобне отче наш Паисие! Не забуди убо нас, чад своих, Богом дарованную ти паству, юже ты сам собрал еси. Без твоея бо помощи ничтоже можем благо сотворити, но, в дому пребывающе Пречистыя Богородицы, во ограде твоей, надеемся Богу угодити. Отче снятый, соблюди нас твоими молитвами и заступи нас от находящих зол, да, твоими молитвами соблюдаемы, Царствия Небеснаго сподобимся о Христе Иисусе, Господе нашем. Ему же слава со Отцем и Пресвятым, и Благим, и Животворящим Его Духом, ныне и присно и во веки веков. Аминь.

### **Тропарь преподобному Паисию Угличскому, глас 8**

Христовы ради любве отечество и род оставил еси, и, ангельскому житию поревновав, в пустыню вселился еси, в нейже многотрудное житие явил еси и чудес дарования от Бога приял еси, Паисие преподобне, моли Христа Бога спастися душам нашим.

### **Ин тропарь, глас тойже**

Христовы ради любве отечество и род оставил еси и, ангельскому житию поревновав, духовному отцу твоему, преподобному Макарию, подражатель быв, града Углича достигл еси и близ того при водах в пустыню, Ангелом показанную, вселился еси, и обитель прекрасну Матери Божией воздвигл еси, и множество монахов собрал еси, имже и наставник ко спасению быв, и чудес дарования от Бога приял еси, Паисие преподобне, моли Христа Бога спастися душам нашим.

### **Ин тропарь, глас тойже**

Слез твоих теченьми пустыни бесплодное возделал еси и, иже из глубины воздыханьми, во сто трудов у плодоносил еси, и был еси светильник вселенней, сияя чудесы, Паисие, отче наш, моли Христа Бога спастися душам нашим.

### **Кондак, глас 2**

Чистотою душевною божественно вооружився и непрестанныя молитвы, яко копие, имый, крепко ссекл еси бесовское ополчение, Паисие, отче наш, моли непрестанно о всех нас.

### **Ин кондак, глас 8**

Украшен добродетельми, преподобне Паисие Богодухновенне, Церкви Христовы красота был еси, подвиги бо иноческими украси ю, блаженне. Темже молим тя: молися ко Господу сподобити нас от всякия брани борителя, вопиющих ти: радуйся, отче преблаженне.

## Величание

Ублажаем тя, преподобне отче Паисие, и чтим святую память твою, наставниче монахов и собеседниче Ангелов.

### **Молитва преподобному Ионе Климецкому, Олонецкому, *чтомая в Свято-Троицком монастыре Олонецкой епархии***

О преподобне и богоносне отче наш Ионо! Ты куплю житейскую еще совершая и по водам озера Онега плавая, бурю на луду водную извержен был еси, и на брезех сих тихое пристанище от волнений житейских обрел еси. Темже и неленостно во трудах, молитвах и слезах Господа ради подвизался, куплю духовную добре совершил еси, и купец премудр Царствия Небеснаго явился еси, и ныне во дворех небесных веселишися, духом твоим неотступен от обители Клименицкия пребывая, идеже многотрудное твое тело почит. Темже и плавающим по водам онежским путь указуеши и от потопления воднаго избавляеши, многжды чудесне призывающим тя являясь, и всем скорый помощник и теплый молитвенник бываеши. И ныне к раце мощей твоих смиренно припадающе, прилежно молим тя, угодниче Божий: призри на ны окаянные и непотребные, морем грехов потопляемые, и бурю душевных страстей волнуемые, и с кораблем душевным на луде злых обычаев сокрушаемые. Буди о нас ходатай ко Господу, к Немуже дерзновение доброе стяжал еси: пролей к Нему теплую молитву твою, да утишит бурю страстей наших, и хладная сердца наша огнем божественных любве Своея да согреет, и тако да сподобит нас теплое покаяние Ему приносить, останок же дней наших благоугодне пред Ним пожити, труды же и скорби жития сего терпеливно, безропотне и со благодарением понести: егда же приспее страшный час исхода нашего от сего жития, да поможет нам грозная мытарства воздушная неудержанно миновати, ниже рыкающим мысленным львом души наша поглотити да попустит, но бездну грехов наших в мори милосердия Своего да погрузит, и ради Своея неизреченных любве и милости к роду человеческому нас да помилует, причастники Своего Царствия соделав, и да сподобит тамо наслаждаться Его божественною любовью, купно с тобою и со всеми святыми, во веки веков. Аминь.

### **Тропарь преподобному Ионе Климецкому (Клименецкому), Олонецкому, глас 4**

Ангельскому житию поревновав, блаженне Ионо, оставил еси отечество твое, Великий Новгород, и, пришед в пределы Олонецкия и в пустыню вселився, в трудах, молитвах и слезах подвизался еси, и, яко мудрый купец, Царствие Небесное наследовал еси. Темже любовию вопием ти: моли Христа Бога, да спасет души наша.

### **Кондак, глас 2**

Христовым стопам последователь быв, блаженне Ионо, радуясь, вселился еси в пустыню, Вышняго Промыслом наставляемь, и, не убоясь вражиих приражений, якоже столп непоколебим, уготовал еси себе в жилище Духу Пресвятому, мы же, память твою совершающе, вопием радостно: радуйся, яко озаряеши нас чудесы твоими, радуйся, яко оставил еси временная ради будущих благ, радуйся, яко возставляеши ленивых ко спасению. Моли убо Христа Бога, отче преподобне, да спасет души наша в День Судный.

## **Величание**

Ублажаем тя, преподобне отче Ионо, и чтим святую память твою, наставниче монахов  
и собеседниче Ангелов.

## **7/20 июня**

*Мученика Феодота Анкирского (303).*

*Собор Ивановских святых.*

### **Тропарь священномученику Феодоту Анкирскому, глас 4**

И нравом причастник, и престолом наместник апостолом быв, деяния обрел еси, богодухновенне, в видения восход, сего ради слово истины исправляя, и веры ради пострадал еси даже до крове, священномучениче Феодоте, моли Христа Бога спастися душам нашим.

### **Кондак, глас 4**

Во святителях благочестно пожив и мучения путь прошед, идольския угасил еси жертвы и поборник быв твоему стаду, богомудре, темже ты почитающе тайно вопием ти: от бед избави ны присно твоими мольбами, отче наш Феодоте.

### **Величание**

Величаем тя, священномучениче Феодоте, и чтим святую память твою, ты бо молиши за нас Христа Бога нашего.

## 8/21 июня

*Великомученика Феодора Стратилата (319).*

*Святителя Феодора, епископа Суздальского и Ростовского (1023).*

*Обретение мощей благоверных князей Василия и Константина Ярославских (XIII).*

*Ярославской (XIII) и Урюпинской (1821) икон Божией Матери.*

### **Молитва великомученику Феодору Стратилату, чтомая в Феодоровском монастыре града Казани**

О святой, славный и всехвальный великомучениче Феодоре Стратилате! Молим тя пред иконою твоею святою: моли с нами и о нас, рабех Божиих (*имена*), умоляемого от Своего благосердия Бога, да милостивно услышит нас, благостыни у Него просящих, и вся наша ко спасению и житию нужная прошения да исполнит. Еще же молим тя, святой победоносе Феодоре Стратилате, разруши силы возстающих на ны врагов, видимых и невидимых. Умоли же Господа Бога, всея твари Создателя, избавити нас от вечного мучения, да всегда прославляем Отца и Сына и Святаго Духа и твое исповедуем предстательство, ныне и присно и во веки веков. Аминь.

### **Молитва ко Господу Богу святого великомученика Феодора Стратилата**

Господи Боже всемогущий, всех уповающих на милость Твою не оставляли, но защищали их! Буди мне милостив и соблюди мя от прелести вражия Твоим защищением, да не паду пред сопротивниками моими, и да не порадуется враг мой о мне. Предстани мне, Спасителю мой, в подвиге сем за имя Твое святое. Ты мя укрепи и утверди и подаждь силу стати мужественно за Тя до крове и положить душу мою по любви к Тебе, якоже и Ты, возлюбив нас, положил еси на Кресте душу Свою за нас. Аминь.

### **Тропарь великомученику Феодору Стратилату, глас 4**

Воинствословием истинным, страсотерпче, Небеснаго Царя воевода предобрый был еси, Феодоре, оружиями бо веры ополчился еси мудренно, и победил еси демонов полки, и победоносный явился еси страдалец. Темже тя верою присно ублажаем.

### **Кондак, глас 2**

Мужеством души в веру оболкийся, и глагол Божий, аки копие, в руку взем, врага победил еси, мучеников превелий Феодоре, с ними Христу Богу моляся не престай о всех нас.

### **Величание**

Величаем тя, страсотерпче святой Феодоре, и чтим честная страдания твоя, яже за Христа претерпел еси.

## **Молитвы святителю Феодору, епископу Суздальскому и Ростовскому**

### **Молитва первая** *из службы*

О великий архиерею Божий, Феодоре преблаженне! Иже град Суздаль и окрестныя грады и страны Святым Крещением просветивый и от тьмы неведения к свету Богоразумия приведый, первый во благодати Православныя веры нам пастырь и угодник Господень, Ангельскаго жития ревнитель и апостолов подобник, граду Суздалю защититель и всем, с верою к тебе притекающим, помощник велий и заступник теплый! Услыши нас, грешных и недостойных раб твоих, в час сей к тебе моление сие приносящих, помяни нас у престола Владыки Царя Вседержителя Бога и помолися о нас, грешных, яко да избавит нас от всех бед и зол, мир же и благоденствие нам дарует. Ей, угодниче Божий и святителю Феодоре! Сохрани страну нашу, град твой Суздаль и всякия грады и веси от глада, губительства, труса и потопа, огня, меча, нашествия иноплемennых, и междоусобных брани, и от напрасныя смерти, и от нападения вражия, и от тлетворных ветров, и от смертоносных язвы, и от всякаго зла. Буди нам помощник и заступник во всей жизни нашей, и избави нас от обидящих и ненавидящих человек, несправедно на ны востающих, и от всех видимых и невидимых сопротивлений вражиих, и спасены нас представи в день страшнаго и грознаго Пришествия Господня, и сподоби нас улучшить деснаго стояния во блаженном Царствии Христа Бога. Яко Тому подобает всякая слава, честь и поклонение, со Безначальным Его Отцем и Пресвятым, и Благим, и Животворящим Его Духом, ныне и присно и во веки веков. Аминь.

### **Молитва вторая, общая святителям Феодору и Иоанну Суздальским и Ростовским** *из акафиста*

О величии угодницы Христовы и чудотворцы, святителие Феодоре и Иоанне! Се мы, недостойнии и грешнии, скорбми многими угнетаеми, к вам усердно прибегаем и со упованием крепким молимся: отцы благомилостивии и благопослушливии, милостивно услышите ныне глас наш молебный и потщитесь на помощь нашу, и яко при жизни вашей всем скорбящим и озлобленным помощники и утешителие бысте, тако и ныне любовь вашу к нам явите, благодатным действием благоприятных молитв ваших претворяюще скорбь нашу в радость, печаль же на утешение: вся бо можете о укрепляющем вас Христе, Егоже вернии служители бысте: от Негоже приявше вся обещанная благая, ниспослите и нам великую и богатую милость Господню, да воспоем и прославим дивнаго во святых Своих Бога, Отца и Сына и Святаго Духа, ныне и присно и во веки веков. Аминь.

### **Тропарь святителю Феодору, епископу Суздальскому, глас 8**

В молитвах бдя, сердцем же о стаде твоем выну болезнуя, учением своим всех просветил еси, Феодоре премудре. Темже Христа Бога моли, в день памяти твоея даровати нам велию милость.

## **Ин тропарь, глас тойже**

В молитве бдя, Горняя желая, дольная возненавидел еси, и, сердцем болезнуя, выну о стаде своем печешися, учением бо своим всех просветил еси, Феодоре премудре, Христа Бога моли в памяти твоей даровати нам велию милость.

## **Кондак, глас 3**

Яко велие солнце, возсия преславная память твоя, премудре Феодоре, в нейже подаваеши в бедах сущим спасение, притекающим к тебе усердно, благодатию, еюже облагодати тя Христос в жизни нескончаемой.

## **Величание**

Величаем тя, святителю отче Феодоре, и чтим святую память твою, ты бо молиши за нас Христа Бога нашего.

## **Молитвы благоверным князьям Василию и Константину Ярославским**

### **Молитва первая**

Святити страстотерпцы Христовы и чудотворцы, благовернии князи Василие и Константине! Яко доблии воины Христовы, доблественне, в телеси суще, подвизастесь: верою же и благочестием и всеми делы благими, яко светильницы сияюще, лукаваго победисте и вся его разжженные стрелы угасисте. Сего ради, неувядаемый венец приемше, с лики святых днесь престолу Божию предстоите, хвалу и благодарение Тому воздающе. Темже и мы, к раце вашей притекающе, молимся: будите ходатаи пред Богом и Господем нашим Иисусом Христом, да избавит град сей и страну от всякаго лютаго обстояния и дарует нам вся благопотребная к житию: паче же да даст нам, по богатству славы Своея, во внутреннем человеце утвердиться, и да сподобит нас наследити Царство Небесное и славити Всесвятое имя Отца и Сына и Святаго Духа, ныне и присно и во веки веков. Аминь.

### **Молитва вторая**

О святити благовернии князи Василие и Константине, благоверных родителей пречестная отрасле, князей российских боговенчанная красото, во время жития вашего грады утверждавшие, сироты и вдовицы питавшии, храмы святых божественными иконами украшавшии! К вам прибегаем, Божии избранницы, и во смирении сердца нашего молим вас: будите ходатаи пред Всемилоstitивым Владыкою, да почует благословение Его на храме сем, идеже вы нетленными телесы вашими почиваете, на граде нашем, егоже вы возлюбисте, и на людех обитающих в нем, да во правоверии и чистоте утвердятся. Молитесь Христу Богу, святити Божии, да сохранит державу сродников ваших целу и нераздельну, да дарует же земли нашей мир и тишину, людям в вере и благочестии преспеяние, да избавит же и нас, ко святых раце многоцелебных мощей ваших с верою притекающих, от бед и напастей, недугов телесных и душевных, и да сподобит Царствия Небеснаго во веки веков. Аминь.

## **Тропарь благоверным князьям Василию и Константину Ярославским, глас 2**

Ваше отечество хвалится обогрением кровей ваших, Церковь же Божия радуется, при-  
емши телеса ваша, людие, песенный лик составлыне, духовною цевницею вопиют: ликуй,  
Василие, радуйся, Константине, Ярославлю слава и всей России радости.

### **Ин тропарь, глас 8**

Возвысившеся на добродетель, к желанию крайнему, и достигосте к Небесней высоте,  
благовернии велиции князи Василие и Константине, и безстрастным житием украсисте души  
своя, лощением же изрядно победисте бесовския полки и восприясте чистую совесть, в молит-  
вах, яко безплотнии, пребысте, возсиясте в мире, аки солнце, преславнии, молитесь спастися  
душам нашим.

### **Кондак на преставление, глас 8**

Яко цвети честнии различнии, в райстей пещи процветше невестественно, отечеству сво-  
ему славу велию и сродникам похвалу и честь явльше, всеистиннии победницы, великий Васи-  
лие и славный Константине, но убо не престайте молящеся о граде нашем и о всех рабех своих,  
избавити их от напастей, и бед, и всех лютых обхождений, вопиющих вам: радуйтесь, граду  
нашему Ярославлю великое утверждение.

### **Кондак на обретение мощей, глас 4**

Днесь Церковь расширяет недра своя и приемлет многоцелебныя мощи ваша, добро-  
победнии страдальцы, Василие славне и Константине Богомудре, и, яко шипок благовонный,  
наполяется пречудными ароматы, богатыми чудодеем от неистощимых сокровищ, от пре-  
славных мощей ваших, и радостно чад своих созывает вопити, людие: радуйся, двоице пречуд-  
ная, отечеству своему стено необоримая.

### **Величание**

Величаем вас, страстотерпцы Христовы, благовернии князи Василие и Константине, и  
читим честная страдания ваша, вы бо молитесь за нас Христа Бога нашего.

### **Молитва ко Пресвятой Богородице пред Ее иконою «Урюпинская»**

О Всемиловитая Госпоже, Дево Богошему и сокрушенно ныне предстоящих образу Тво-  
ему услыши глас. Вемы бо, о Содетеля нашего Мати, яко Ты еси предстательство христиан  
непостыдное и ходатайство ко Творцу непреложное. Вемы и сие, яко беззакония наша превзы-  
доша главы наша и яко бремя тяжкое отяготеша на нас, и уже несмы достойни видети высоту  
Небесную, ниже воззрети ко престолу славы Сына Твоего и Бога нашего, но достойни явихомся  
мук и вечного осуждения. Сего ради к Тебе припадаем, Тя просим умиленно, к Тебе со слезами  
взываем: вознеси к Нему Матернее Твое моление, да не отвержет нас грешных от лица Своего,  
но, яко Милостив, да простит нам согрешения наша вольная и невольная, на путь спасения нас  
наставляя и свыше силою ко творению заповедей Своих укрепляя. Да сохранит нас от соблаз-

нов мира, от вожделений греховных, от козней диавольских и от нападения видимых врагов. Да благословит дела рук наших, подавая обители сей и всякому граду и стране обилие благ земных. Да сотворит нам дни благи и безмятежны, да оградит миром Церковь Свою Святую и разстоящаяся да соединит Той, яко Благ Господь, Долготерпелив и Многомилостив, от всея твари со Отцем и Святым Духом славимый во веки веков. Аминь.

### **Тропарь Божией Матери ради иконы Ее «Урюпинская», глас 3**

Явилася еси на древе в Донской земли благодатная Твоя икона, Богородице, больныя исцеляти, заблуждшия обращати; темже умильно молимся Тебе: избави град наш от всякаго зла и спаси люди, к Тебе притекающия.

### **Кондак, глас 5**

Всеблагая Чистая Богородице, к Тебе прибегаем, вернии, Тобою бо познахом милость Божию, чудную икону Твою, от неяже вси здравие и спасение приемлем.

### **Величание**

Величаем Тя, Пресвятая Дево, и чтим образ Твой святыи, от него же истекает благодатная помощь всем, с верою притекающим к нему.

*Пред иконой Пресвятой Богородицы «Урюпинская» молятся об исцелении слепых, страдающих параличом, ревматизмом, головной болью, расслаблением, слабоумием, об одержимых сильной тоской.*

### **Молитва ко Пресвятой Богородице пред Ее иконою «Ярославская» из книги молебных пений**

О Пресвятая Дево, Мати Господа вышних сил, Небесе и земли Царице и града нашего Ярославля всемошная Заступнице! Приими хвалебное пение сие от нас недостойных раб Твоих и вознеси молитвы наша ко престолу Бога Сына Твоего, да милостив будет неправдам нашим и пробавит благодать Свою чтущим Всечестное имя Твое и с верою и любовью поклоняющимся чудотворному образу Твоему. Несмы бо достойни от Него помиловани быти, аще не Ты умилостивиши Его о нас, Владычице, яко вся Тебе от Него возможна суть. Сего ради к Тебе прибегаем, яко к несомненной и скорей Заступнице нашей, и Тебе, яко всемогущей Помощнице, сами себе и друг друга и всю жизнь нашу по Христе Бозе предаем, ныне и присно и во веки веков. Аминь.

### **Тропарь, глас 4**

К Богородице прилежно ныне притецем, грешнии и смиреннии, и припадем, в покаянии зовуще из глубины души: Владычице, помози, на ны милосердовавши, потщися, погибам от множества прегрешений, не отврати Твоя рабы тщи, Тя бо и едину надежду имамы.

## **Кондак, глас 6**

Предстательство христиан непостыдное, ходатайство ко Творцу непреложное, не презри грешных молений гласы, но предвари, яко Благая, на помощь нас, верно зовущих Ти: ускори на молитву и потщися на умоление, предстательствующи присно, Богородице, чтущих **Тя**.

## **Величание**

Величаем Тя, Пресвятая Дево, Богоизбранная Отроковице, и чтим образ Твой святой, имже точиши исцеления всем с верою притекающим.

*Пред иконой Пресвятой Богородицы «Ярославская» молятся об исцелении телесных болезней.*

## 9/22 июня

*Преподобного Кирилла, игумена Белоезерского (1427).*

*Праведного Алексия Московского (1923).*

### Молитвы преподобному Кириллу, игумену Белоезерскому

#### Молитва первая

##### *из акафиста*

О священная главо, преподобне и богоносне отче Кирилле! Припадаем к тебе с верою и любовью и просим тя, небеснаго заступника нашего: яви велие милосердие твое нам, смиренным и грешным, и пролей теплыя молитвы твоя о нас ко Господу Богу. Свойственно есть тебе благосердие, святче Божий, ибо живущу ти на земли, едино бысть у тебе попечение, еже спасти от погибели души человеческия, и вся твоя жизнь святая бысть зеркалом добрых дел, о нихже прославляшеся в тебе Отец Небесный, к Немуже велие дерзновение стяжав, испроси нам у благодати Его: веру праву, благочестие нелицемерное, покаяние истинное, братолюбие совершенное и преуспеяние во всех благих делах. Исходатайствуй нам здравие душевное и телесное, земли плодоносие, воздуха благорастворение, мирное и безмятежное житие, непостыдную христианскую кончину и добрый ответ на Страшном Суде Христовом. Сохрани Церковь святую и державу Российскую от браней и нестроений. Огради и обитель твою честную от всякаго зла и вся правоверныя люди, к тебе приходящия и мощем твоим покланяющияся, осени небесным твоим благословением и вся прошения их во благо исполни. Ей, отче, не презри молитв наших, со умилением тебе возносимых, но буди о нас теплый предстатель ко Господу и сподоби нас помощию твоею святою спасение вечное получитьи и Царствие Небесное унаследовати, да славословим велия щедроты и неизреченныя милости Отца и Сына и Святаго Духа, в Троице покланяемаго Бога, и твое отеческое заступление, во веки веков. Аминь.

#### Молитва вторая,

##### *чтомая в Кирилло-Белоезерском монастыре Вологодской епархии*

О богоблаженне и преподобне отче наш Кирилле, пастырю добрый и истинный строителю винограда Христова, отцем славо, преподобных сподвижнике, праведным совсельнике, иноков наставнике и общаго жития совершителю, ныне на небеси Святей Троице со всеми святыми предстояй! Молимся тебе при гробе твоем, яко чадолюбивому отцу нашему, и от сердца с любовью вопием: о преподобне отче Кирилле, помяни стадо твое, еже мудре собрал еси, и соблюди твоими молитвами Богом дарованную ти паству, и не презри нас чтущих пречестную и многорадостную твою память: сохрани и соблюди нас от всех враг видимых и невидимых; очисти наша согрешения, и отжени от нас облак страстей, и просвети наши душевныя очи; гнивый язык наш исправи, смысл очисти и разум освяти; прииди посреде нас невидимо, и от всех нас моления Богу возсылаемая приими, и донеси сия ходатайственне всех Творцу и Избавителю, в Троице Святей покланяемому Богу нашему, яко да согрешений наших оставление получим, благодатию и человеколюбием Господа нашего Иисуса Христа, с Нимже Отцу и Святому Духу слава подобает, ныне и присно и во веки веков. Аминь.

## **Тропарь преподобному Кириллу, игумену Белоезерскому, глас 1**

Яко крин в пустыни давидски процвел еси, отче Кирилле, злострастия терние искореняя, и собрал еси в ней ученик множество, страхом Божиим и учением твоим наставляемых, ихже и до конца, яко чадолюбивый отец, не оставил еси, посещая, да вси вопием: слава Давшему ти крепость, слава венчавшему тя, слава Действующему тобою всем исцеления.

## **Кондак, глас 8**

Яко преобидев тленная и долу влекущая мудрования, отче, к вышнему течению радостно устремился еси, и тамо со святыми Пресвятей Троице предстоя, моли от враг сохранитися стаду твоему, яко да святое твое усение празднующе, вопием: радуйся, преблаженне Кирилле, отче наш.

## **Величание**

Ублажаем тя, преподобне отче Кирилле, и чтим святую память твою, наставниче монахов и собеседниче Ангелов.

## **Молитвы праведному Алексию Московскому**

### **Молитва первая**

#### ***из акафиста***

О всечестный и преблаженный отче наш Алексие, дивный старче Московский и всея Церкви Российския похвало и радование! Велию любовь ко Господу имея, заветы евангельския непреложно исполняя, душу твою за паству полагал еси, сердцем милующим болезнуя о всех, просящих твоея помощи. Приими малое сие моление наше, и яко в земном житии твоём всяку слезу утолял и от всякия скорби избавлял еси, тако и ныне, милосердный молитвенниче и ходатаю наш, возьми тяготы, болезни и скорби наша, исполни страждущая сердца радостию и умоли Человеколюбца Бога о прощении прегрешений наших, да очистив душу покаянием, к добродетельному житию обратимся. Ей, старче Алексие, буди и нам пастырь добрый, на стезю спасения наставляющий, да молитвами твоими безпорочно пройдем путь жития нашего и обрящем Отечество Небесное, идеже ты со Ангелы и всеми святыми предстоиши престолу Святыя Троицы, славяще Безначального Отца со Единородным Его Сыном и Пресвятым, и Благим, и Животворящим Его Духом во веки веков. Аминь.

### **Молитва вторая**

#### ***из акафиста***

К тебе, о праведный отче Алексие, мы, грешнии и недостойнии, притекаем и со умилением взываем ти: призри ныне милостивно с высоты святыя своя на Отечество наше и нас, тя прославляющих. Приявший в житии своем тяготы людей и сердцем милующим понесый скорби их, приими в молитвенное твое предстательство и нас, грехи многими обремененных и суетою мира сего утружденных.

В тебе, о дивный старче, прославися Господь, явив тя таинником милости Божией. Тя призываем неотступно: буди врач душам и телесем нашим, унывающим – утешитель, малодушным дерзновение низпосли, помраченных злобою всепрощению научи, воздержанию спо-

собствуй. Воспламени, благий делателю винограда Христова, хладная сердца наша ревностию служения твоего, научи молитве непрестанной и деятельной любви с утеснением себе ради блага ближних наших. Укрепи молитвами твоими чада Церкви нашея, да проживем в любви и мире, а вне ограды церковныя пребывающии да уразумеют Христову истину и вкупе с нами прославят Животворящую и Нераздельную Троицу и твое милостивное предстательство во веки веков. Аминь.

### **Тропарь праведному Алексею Московскому, глас 4**

Помози в бедах, утеша в скорбех, пастырю добрый, отче Алексие. Подвигом бо старчества миру просиявый, веру и любовь Христову во мраце беззакония исповедал еси, болезнуя сердцем о всех притекающих к тебе. И ныне за ны Бога моли, любовию чтущия тя.

### **Кондак, глас 4**

Велии труды любви и милосердия подъял еси, праведный старче Алексие, от святого пастыря Кронштадтскаго благословение на помощь страждущим прияв, беды и скорби людския яко вериги на рамо свое возложи. Мы же ведуще тя молитвенника дерзновенна ко Господу, со умилением зовем ти: моли Христа Бога спастися душам нашим.

### **Величание**

Величаем тя, святыи праведный отче Алексие, и чтим святую память твою, ты бо молиши за нас Христа Бога нашего.

## 10/23 июня

*Обретение мощей святителя Василия, епископа Рязанского (1609).*

*Блаженной Любви Рязанской (1921).*

*Святителя Иоанна, митрополита Тобольского (1715).*

*Собор Сибирских святых.*

*Собор Рязанских святых.*

### Молитвы святителю Василию, епископу Рязанскому

#### Молитва первая

##### *из службы*

Святителю отче Василие! Дивным шествием твоим по водам и нетлением честных мощей твоих уверившись, яко имаши велию благодать у Господа Бога, с верою и надеждою к тебе прибегаем и умиленно молим тя: моли о нас Христа Бога нашего, сохранившего тя, якоже Петра, от потопления в волнах речных и от истления в сердце земли, да благодать Его спасительная сопутствует нам на всех путех жизни сея, сохраняющи ны невредимы от всякого злаго обстояния, всякий противный ветер напастей и бурю страстей утоляющи, тихое же и безмятежное плавание в житейском сем мори нам дарующи. Да простит нам Милосердый Господь всякое прегрешение, вольное и невольное, немощь естества нашего благодатию Своею покрывая, да утвердит нас во святей Своей Православней вере и благочестии, исполняя сердца наша любви и ревности о соблюдении заповедей Его ко спасению душ наших. Церкви Православно-Российстей да дарует мир и благоденствие, да возглаголет в сердце правителей наших благая о ней и о всех людех, да низпослет земли нашей времена мирна, благорастворены воздухи, земли плодonoсие и вся на пользу настоящего жития потребная и да избавит вся грады и веси отечества нашего и всю землю Русскую от глада, губительного огня, смертоносных язв и от всякого зла, да тако в мире, благоденствии и преспеянии в добродетелех путь жизни сея прешедше, внидем в вечное царство, уготованное святым Его. О всехвальный святителю наш и угодниче Христов Василие! Веруем и уповаем, яко можеша молитвами твоими устроить вся благая душам и телесам нашим, имея Помощницу Преблагословенную Владычицу нашу Богородицу, Еяже честною и чудотворною иконою сохраняемъ, шествие по водам, яко по суку, совершив, богоспасаемого града Рязани достигл еси. Сего ради прилежно молим тя: не отвержи нас от заступления твоего, потщися на помощь нашу и умоли за ны Господа и Бога нашего Иисуса Христа, избавльшаго тя от злокозненных сетей лукаваго и клеветы человеческия, да, призрев на ны милостивно, избавит нас от всякия беды, скорби и болезни душевныя и телесныя и да сподобит нас, грешных и недостойных, Небеснаго Царствия Своего молитвами Пресвятыя Матере Своея и твоим теплым за ны предстательством, всегда, ныне и присно и во веки веков. Аминь.

#### Молитва вторая

##### *из службы*

Богоизбранне первосвятителю наш и угодниче Христов Василие, святостию жития твоего, чудным по водам плаванием и нетлением мощей твоих препрославление! Предстою престолу Вседержителя и имея велие к Нему дерзновение, моли Его, да пробавит милость Свою к нам, грешным и недостойным рабам Своим, и дарует народу здравие, долгоденствие и во всем благое поспешение: пастырем Церкви да подаст духовное трезвение и ревность о спасении

пасомых; градоначальником и судиям страх Божий, правоту и безкорыстие; воином терпение, мужество и на враги одоление; супругом взаимную любовь, верность и единомыслие; куплю деющим праводушие, земледельцем трудолюбие и трезвенность, сирым призрение, болящим исцеление, обидимым заступление, оклеветаемым оправдание и всем людям паствы твоея вся ко временней и вечней жизни потребная. Паче же моли Господа, молитвенниче наш, да простит нам всякое согрешение, вольное и невольное, и очистит от всякия скверны плоти и духа; да избавит от козней исконнаго врага, ненавистника и человекоубийцы, и сохранит от клеветы человеческия; да утвердит во истинней спасительней вере и нелицемернем благочестии; да соблюдет от суетности и душегубительных учений духов лестных, действующих в вещи сем в сынех противления; да охранит сердца наша от прельщения красными мира сего и да научит огребатися от плотских похотей и страстей, горняя мудрствовать, а не земная. Моли, отче наш, Всесвятаго и Божественнаго Духа, да возсияет свет благодати Его братиям нашим по плоти, во тьме лжеверия сидящим, и да познают Христа, Бога Истиннаго, Единого Спасителя всех человек; да возсияет свет сей и блуждающим на распутиих раскола, да вразумятся и приидут во ограду Православныя Церкви, в нейже единой несомненно содевается вечное спасение верных. О святителю Христов, молитвенниче наш! Моли Христа Бога и Пречистую Матерь Его, да упразднит вражды наша и нестроения, соединит же вся ны богоподобною любовью, да в мире и единомыслии, желанием спасения горяще, Господеви работающе, друг друга тяготы носяще, добрым подвигом подвижаемся и, течение скончавше, достигнем в тихое пристанище Небеснаго Царствия и прославим неизреченное человеколюбие и милосердие Спасителя нашего Иисуса Христа, Сына Божия, со Безначальным Его Отцем и Пресвятым Духом во веки веков. Аминь.

### **Молитва третья**

Святителю отче Василие! Умоли Господа Бога, да простит нам всякое согрешение, вольное и невольное, и очистит нас от всякия скверны плоти и духа; да избавит нас от козней исконнаго врага нашего, и сохранит от клеветы человеческия; да утвердит нас в истинной спасительной вере, и нелицемерном благочестии; да соблюдет от суетности и душегубительных учений века сего; да охранит сердца наша от соблазнов мира, и да научит огребатися от плотских страстей и похотей, горняя мудрствовать, а не земная. Аминь.

### **Тропарь святителю Василию, епископу Рязанскому, глас 4**

Первее в Муроме святительством почтен был еси, из негоже несправедно изгоняемъ, на мантию, яко на легкий корабль, возшел еси, на нейже паче естества, яко безплотен, по водам шествие творя, промыслением Вышняго и заступлением Богоматере управляемъ, богоспасаемаго града Рязани достигл еси и в нем, архиерейства престол восприим, богоданную паству рязанскую добре упасл еси, святителю отче наш Василие, моли Христа Бога спастися душам нашим.

### **Ин тропарь, глас 4**

Правая веры и чистаго жития крепкий хранителю, чудесно, речными волнами, на мантии твоей, с иконою Пречистыя, от неправой клеветы и нечистаго осуждения, из Мурома принесен был еси в страну Рязанскую, идеже утвердив престол своего архиерейства, добре упасл еси богоданную тебе паству, святителю отче наш Василие, моли Христа Бога спастися душам нашим.

## **Кондак, глас 8**

Яко многосветлая звезда, от града Муромы возсиял еси, святителю Василие, по водам же дошед до града Рязани, Церковь Божию добре упасл еси, просвещая люди учением и житием твоим. Поминай и ныне чада твоя, молим тя, наставниче наш добрый, и за ны Христу Богу и Пречистой Его Матери молися, да благодарною душою зовем ти: радуйся, угодниче Христов и теплый к Богу о нас молитвенниче.

## **Величание**

Величаем тя, святителю отче Василие, и чтим святую память твою, ты бо молиши за нас Христа Бога нашего.

## **Молитва ко святой блаженной Любви Рязанской *из жития блаженной***

О блаженная дево Любовь, угодница Христова! Услыши нас грешных, молящихся тебе. Приими молитву нашу и принеси ю к милостивому Человеколюбцу Богу, Ему же ты ныне в радостях святых и с лики Ангел предстоиши. Умоли Его благосердие, да сохранит град Свой сей (Рязань), в нем же добродетельно поживе, Богу угодила еси, от всех навет вражиих, да не осудит нас по беззакониям нашим, но да сотворит с нами по милости Своей, и испроси нам у Христа и Бога нашего мирное и безмятежное житие, здравие душевное и телесное, земли благоплодие и во всем всякое изобилие и благоденствие, и да не во зло обратим благая, даруемая нам от Всещедраго Бога, но во славу Его и в прославление твоего заступления, паки молим тя, блаженная мати наша Любовь, посещай нас, тебе молящихся, в нуждах наших, да тобою заступаемы, сподобимся ны, грешныя, в день судный одесную Сына Божия стати твоими святыми молитвами ко Спасу и Пресвятей Его Матери, Преподобнословенней Владычице нашей Богородице, от всех родов убажваемой, ныне и присно и во веки веков. Аминь.

## **Тропарь блаженной Любви Рязанской, глас 5**

Любовью наречена была еси во Святом Крещении, любовь Христову познала еси, в житии дерзновение велие стяжала еси, темже к тебе усердно прибегаем из глубины сердец наших взывающе: молися убо ко Господу, Любовь блаженная, богомудрая, даровати миру мир и душам нашим велию милость.

## **Кондак, глас 3**

Святителем Христовым Николаем исцеленная и на служение Богу и людям имже благословенная, крест свой юродства с любовию до конца пронесшая. Святая блаженная Любовь, не остави нас, почитающих святую память твою, ныне предстоя в лике святых престолу Пресвятыя Троицы, молися о благоденствии отечества твоего и о спасении душ наших.

## **Величание**

Убажаем тя, святая блаженная мати Любовь, и чтим святую память твою, ты бо молиши за нас Христа Бога нашего.

## **Молитва святителю Иоанну, митрополиту Тобольскому из службы**

О святителю Христов Иоанне, Божию престолу со святыми предстояй! Ты еси отец наш любвеобильный и молитвенник наш теплый. Умоли Господа Бога, да подаст нам коегождо потребно полезная: скорбящим утешение, немощным здравие, заблуждшия да наставит и обратит на путь покаяния, распри и раздоры умирит, неведущия Христа люди на путь спасения да обратит и всех нас единением духа и любви в Единой Святей Своей Церкви соединит, да сохранит нас от глада, града, труса, потопа, огня, меча, междоусобных брани и напрасныя смерти, наипаче же от искушений, облегающих нас в жизни сей, да дарует нам мирное пожити зде житие и веру свою православную невредину соблюсти. О святой угодниче Христов, архипастырю предобрый, молитвенниче наш неусыпный! От юности всего себе Богу посвятив, равноангельное житие стяжал еси, исполнен бе радости духовная, яже озаряше светлость лика твоего и сердца верных утешаше, поистине бе светильник горяй и светяй, святолепно пожив, от Господа сподоблен бе дара прозрения, время кончины своея предуведа, моляся пред образом Пречистой Богородицы, коленопреклоненне преставися; ныне проси Ю о нас, да будет нам Покровительница в сей многотрудней жизни и в час кончины нашея да умолит Всеблагаго Господа сподобиться нам в лице благоугодивших предстати престолу Его и восхвалити в Троице славимаго Бога, Отца и Сына и Святаго Духа, во веки веков. Аминь.

## **Тропарь святителю Иоанну, митрополиту Тобольскому, глас 8**

Наставниче благочестия, сиротствующих питателю, скорбящих утешителю, недугующих врачу безмездный, душею страждущим скорый помощниче, теплый молитвенниче ко Господу, святителю отче Иоанне, моли Христа Бога спастися душам нашим.

## **Кондак, глас 2**

Явился еси во тьме неведения пребывающим просветитель, вдов и сирот утешитель, дивный врач немощствующих, младенцев и отроков наставник, родителем же пресветлое радование, святителю отче Иоанне, моли Христа Бога, подати стране нашей в вере утверждение, воинам на враги победу и одоление, людям же своим велию милость.

## **Величание**

Величаем тя, святителю отче Иоанне, и чтим святую память твою, ты бо молиши за нас Христа Бога нашего.

## 11/24 июня

*Преподобного Варнавы Ветлужского (1445).*

*Перенесение мощей преподобного Ефрема Новоторжского (1572).*

*Иконы Божией Матери, именуемой «Достойно есть» («Милующая») (X).*

### **Молитва преподобному Варнаве Ветлужскому, чтомая в Троицком соборе града Варнавина Костромской епархии**

О всеблажнне отче преподобне Варнаво, теплый заступниче и помощниче с верою призывающим тя! Избави нас молитвами твоими ко Господу от всякаго обстояния бесовскаго. Изми нас, окаянных рабов твоих, о чудотворче Варнаво, от уст пагубнаго змия, ищущаго пожрети нас и свести во ад живых. Прости нас, отче, елико согрешихом ти, исторгни нас от греха и всякия напасти, приходящия грехов ради наших. Подаждь душам нашим утешение, всади в сердца наша страх Суда Божия, избави нас от врагов наших видимых и невидимых, тебе бо имамы тепла молитвенника и заступника, еже в бедах сущия и в грехи впадшия. Ты бо явился столп благочестия, воздержания правило, смиренномудрия образ, целомудрия наставник, убогим и сиротам заступник и хранитель прибегающим к тебе. Кто убо по достоинству может похвалити равноангельное твое житие и кто может изчести твоих трудов подвиги и слезы ко Господу? Воистинну яко солнца светлейши возсия твоя исправления, ревнитель бо бысть всем святым, преподобных и праведных учитель духовный и всем, призывающим тя, молитвенник ко Пресвятей Троице. Ты, яко мир оставил еси и яже в мире, и нас приведи ко Господу молитвами твоими, отче честнейший, да и мы сподобимся вечных благих, ихже наслаждаешися: Небесныя славы, желаемого Иисуса Христа и сладчайшаго Владыки и Господа всех. Емуже подобает всякая слава, честь и поклонение, со Безначальным Его Отцем и Пресвятым и Благим и Животворящим Его Духом, ныне и присно и во веки веков. Аминь.

### **Тропарь преподобному Варнаве Ветлужскому, глас 1**

Желанием духовным распалився и мятежи мирския отринув, к Богу любовь прилежно присовокупися. И Того вседушне взыска, во внутреннюю пустыню отшел еси, при водах вселися, идеже во слезах и трудах пребывая многолетное время, в терпениих многих житие ангельское проходил еси в наставлении Божественнаго Разума и множество монахов собрал еси, мудре, ихже посещая не остави, Варнаво преподобне, отче наш, Пресвятей Троице моляся от зол всяческих избавити и спасти души наша.

### **Кондак, глас 8**

От юности, преподобне, плоть твою в постех и молитвах источил еси и, крест твой взем, усердно последовал еси Христу, темже и к Вышним течение радостно совершил еси, идеже со всеми святыми предстоиши. И ныне стадо твое посещай, поминая чтущих всесвятую память твою, да вси благодарственно вопием ти: радуйся, Богомудре Варнаво, наставниче пустынный.

### **Величание**

Ублажаем тя, преподобне отче Варнаво, и чтим святую память твою, наставниче монахов и собеседниче Ангелов.

## **Молитвы преподобному Ефрему Новоторжскому**

### **Молитва первая** *из службы*

О преславный Господень угодниче и Богом собраннаго zde о тебе стада Христова предобрый пастырю и наставниче, преподобне и Богоносе отче наш Ефреме! Приими убогое сие наше и малое от любви душевныя приносимое тебе моление и не презри нас, грешных, требующих твоея помощи и заступления. Се бо мы, предстателя тя в нуждах непостыднаго стяжавше, верою несомненною тебе в ходатайство призываем, ты же, яко велие имеяй дерзновение ко Господу и Пречистой Его Матери, буди молитвенник, помощник и ходатай о всех, со тщанием в Божественный твой храм приходящих, честных же и многоцелебных мощей твоих со страхом и благоговением прикасающихся, услыши ны, святче Божий, и призри милостивым оком на предстоящия цельбоносному твоему гробу люди. Вемы бо воистинну, яко аще по отшествии твоём плотию и разлучился еси от нас, но духом неотступно пребываеши с нами, тем и вся нам, яже ко спасению полезная, усердне просящим, молитвами твоими подати можеш. Простри убо преподобныя длани твоя, о добрый и великий наш заступниче, и не престай молиться о стране нашей и о людех, на всяком месте благочестно тебе на помощь призывающих. Сохрани же вся грады и страны Российския от нашествия иноплеменик, междоусобных брани, глоторных ветр и от всякаго губительного зла. Всех нас избави от всяких бед и скорбей. Яко да тобою управляеми, многмятежное маловременнаго жития сего море безбедне преплывше, достигнем в желаемое оное Небесное пристанище и прославим Всесвятую, Равночестную и Единосущную Троицу, Отца и Сына и Святаго Духа, ныне и присно и во веки веков. Аминь.

### **Молитва вторая** *из акафиста*

О священная главо, великий и предивный чудотворче, отче наш Ефреме! К тебе, скорому помощнику и усердному о нас молитвеннику, смиренно прибегаем и молитвенно просим тя: нас, скорбных и обремененных грехи многими, не остави помощи твоею святою и заступлением благодатным. Не забуди нас, чад твоих, отче священнейший, но поминай нас присно в небесных богоприятных молитвах твоих у престола Пресвятыя Троицы, идеже со Ангелы и всеми святыми предстоиши и зриши вся наша нужды и беды, яко обуреваемся страстьми и не имамы дерзновения ко Творцу, просити Его о помиловании и спасении. Темже тебе предлагаем, яко умиловителя пред Господем, и тобою уповаем на милость Божию и прощение грехов наших от Вседержителя получитьи и спасение вечное унаследовати, да славим и поем величие и благодать и человеколюбие Отца и Сына и Святаго Духа, и твое отеческое заступление, ныне и присно и во веки веков. Аминь.

### **Тропарь преподобному Ефрему, архимандриту Новоторжскому, глас 1**

Божественною свыше благодатию просветився, Богомудре, и по смерти яви тя светлость жития твоего, темже источаеши миру благоухание, иже с верою притекающим к раце мощей твоих, Ефреме преподобне. Тем вопием ти: слава Давшему ти чудесем благодать, слава Прославльшему тя в чудесех, слава Действующему тобою всем исцеления.

## **Кондак, глас 8**

Светозарную лучу похвалим, преподобне, твою честную раку, многосветлою свещею просвещает бо Господь церковь твою от цельбоносного гроба твоего и озаряет омраченная наша сердца. Якоже солнце незаходимое, отче, подобие образа твоего возсия нам, и град Торжек тобою благодать приемлет, обогащаящу ти всех нас добротой чудес, содеянием благодати поющих ти: аллалуия.

## **Величание**

Ублажаем тя, преподобне отче Ефреме, и чтим святую память твою, наставниче монахов и собеседниче Ангелов.

## **Молитвы ко Пресвятой Богородице пред Ее иконою «Достойно есть» («Милующая»)**

### **Молитва первая** *из книги молебных пений*

Достойно славимая и праведно от всех горних чинов ублажаемая, яко без сравнения их превосходящая, Бога и Творца всяческих рождающая, паче всех возвеличенная, Пречудная Владычице! Молися из Тебе воплощенному Христу Богу нашему, да призрит на ны люди безответныя, да сохранит нас невредимых от всех навет вражиих и злых клевет, много бо может Твоя Матерняя молитва, по реченному: проси, Мати Моя, не отвращая, но вся прошения Твоя исполню. Сего ради, радостию о сем исполняеми, взываем Ти: спаси, Владычице, погибающих рабы Твоя, просвети омраченных суетою века сего и приведи ны ко сладчайшему Иисусу, да вечно радуемся взываем: слава Отцу, слава Сыну, слава Святому Духу, слава и Тебе Преславней и Пренепорочней Деве Богоматери, ублажаемой и благословляемой в безконечныя веки веков. Аминь.

### **Молитва вторая** *из акафиста*

О Пресвятая и Премилостивая Владычице Богородице! Припадающе ко святей иконе Твоей, смиренно молимся Тебе, вонми гласу моления нашего, виждь скорби, виждь беды наша и, яко любвеобильная Мати, потщися на помощь нам беспомощным, умоли Сына Твоего и Бога нашего, да не погубит нас за беззакония наша, но да явит нам человеколюбно Свою милость. Испроси нам, Владычице, у благости Его телесное здравие и душевное спасение, и мирное житие, земли плодоносие, воздуха благорастворение, и благословение свыше на вся благая дела и начинания наша. И якоже древле призрела еси милостивно на смиренное славословие послушника Афонского, воспевавшего Тя пред пречистою иконою Твоею и послала еси к нему Ангела научить его пети песнь небесную, еюже славословят Тя Ангели; тако и ныне приими и наше усердное молитвословие, Тебе приносимое. О Царице Всепетая! Простри ко Господу богоносней Твои руце, имиже Богомладенца Иисуса Христа носила еси, и умоли Его избавить нас от всякого зла. Яви, Владычице, Твою милость к нам: болящих исцели, скорбящих утешь, бедствующим помози и сподоби нас благочестно житие сие земное совершить, христианскую непостыдную кончину получитьи и Небесное Царствие наследить Матерним ходатай-

ством Твоим к рождшемуся от Тебе Христу Богу нашему, Ему же со Безначальным Его Отцем и Пресвятым Духом подобает всякая слава, честь и поклонение ныне и присно и во веки веков. Аминь.

### **Молитва третья** *из книги молебных пений*

О Всепетая Владычице мира, преукрашенная Всецарице, честнейшая Херувим и славнейшая без сравнения Серафим! Небо и земля ублажают Тя, яко в вечное примирение их предизбранную от Животворящей Троицы; Тя величает всяк возраст и чин земнородных, без истления Бога Слова рождшую, сущую Богородицу; Архангели и Ангели боголепно воспевают Тя, яко превозлюбленную Дщерь Бога Отца; Херувими и Серафими с веселием славят Тя, яко пречистую Невесту Бога Духа. Достойно есть, яко воистину, блажити Тя Богородицу, Присноблаженную и Пренепорочную и Матерь Бога нашего. Ты, о Всеблагая Госпоже, по Бозе упование всех концов земли и сущих в мори далече, Ты сирых и убогих заступление, Ты безпомощных помощь, и непостыдное прибежище многочестных и отчаянных, Ты едина, по гласу церковному, всеми презренных и отверженных не оставляеши Твоим покровом и благодатию. О Преподобная Мати щедрот и милосердия, помилуй и спаси мя всенепотребного раба Твоего (*имя рек*) с сердцем сокрушенным припадающего ко святому образу Твоему, пред нимже небесный благовестник радости, песенно ублажив Тя, научил есть нас и предаде всем блажити Тя, милостивую Матерь Всемилоственного Спаса нашего. Воплощением от Духа Святого и Тебе, Марии Девы, Сын Твой послася от Отца исцелити сокрушенные сердцем, дати пленным отпущение, слепым прозрение и отпустить сокрушенных во отраду. Матернее убо дерзновение имущи умили Твое, да отпустишь мне страстьми плененному согрешения, да исцелит благодатию Своею мя сокрушенного, да просветит омраченного, да укрепит мя немощного прочее время жития сего маловременного и многотрудного перейти в безмятежии и мире, покаянии и чистоте, поучении смертнем и всяком благодеянии; христианский же конец непостыден даруй ми, и сподоби мя, недостойного, наследника быти вечных и блаженных жизни, да со избранными достойно и праведно ублажаю Тя Присноблаженную и величаю всех Владыку, нашего ради спасения из Тебе вочеловечшася, со Безначальным Его Отцем и Животворящим Его Духом, ныне и присно и во веки веков. Аминь.

### **Молитва четвертая,** *чтомая в Бугульминском Александро-Нвском монастыре Самарской епархии*

О Пресвятая Дево Богородице, в скорбех наших едино утешение! Тобою, Дево Богородице, пение послушника Афонского чудесне дополнися, восполни убо и наша силы духовныя, яко да возможем достойно пети Тя, воистину рождшую Спасителя миру. Вознеси моление к Сыну Твоему о нас, да не оскудеет вера в нас грешных, юже диавол исхитити тщится в рабех Твоих и во всем христианстем роде. О сих сокрушенным сердцем молимся. Помози нашему маловерию, еже в нас дела злонравная посеявает, самолюбие же и гордыню, сребролюбие и сластолюбие, невоздержание и пьянство, от нихже да избавимся предстательством Твоим, Пречистая, и да сподобимся спасение получитьи благодатию Господа нашего Иисуса Христа, Ему же подобает честь, благодарение и поклонение, со Безначальным Его Отцем и со Святым и Единосущным Ему Духом, во веки веков. Аминь.

## **Тропарь Божией Матери ради иконы Ее «Достойно есть» («Милующая»), глас 4**

Притецем, вернии, со дерзновением к милующей Царице Богородице и умильно воззовем к Ней: низпосли на ны милости Твоя богатая: Церковь нашу сохрани, люди во благоденствии соблюди, землю нашу избави от всякого обстояния, мир даруй миру и спасение душам нашим.

### **Ин тропарь, глас тойже**

Отцев все Афонское множество, соберитесь, верно празднующе, днесь радующеся и светло восклицающе вси в веселии: Божия бо Мати ныне от Ангела преславно воспевается. Темже яко Богородицу присно Сию славим.

### **Кондак, глас 4**

Празднует днесь весь Афон, яко песнь прият от Ангела чудно Тебе, Чистой Богоматери, Юже вся тварь чтит, славящи.

### **Ин кондак, глас 8**

Архангельский глас вопиет Ти, Всецарице: достойно есть, яко воистину, блажити Тя, Богородицу, Присноблаженную и Пренепорочную и Матерь Бога нашего.

### **Величание**

Достойно есть величати Тя, Богородице, Честнейшую Херувим и Славнейшую без сравнения Серафим.

*Пред иконой Пресвятой Богородицы «Милующая», или «Достойно есть», молятся при душевных и телесных болезнях, при окончании всякого дела, при эпидемиях, о счастье в браке, при несчастных случаях.*

## 12/25 июня

*Преподобного Онуфрия Великого (IV).*

*Преподобного Петра Афонского (734).*

*Обретение мощей (1650) и второе прославление (1909) благоверной княгини Анны Кашинской.*

*Преподобного Арсения Коневского (1447).*

*Преподобных Вассиана и Ионы Пертоминских, Соловецких (1561).*

*Блаженного Иоанна, Христа ради юродивого, Московского чудотворца (ок. 1589; обретение мощей 1672).*

### Молитвы преподобному Онуфрию Великому, пустынножителю

#### Молитва первая, читаемая в Яблочинском Свято- Онуфриевском монастыре Холмской епархии

О пречудне и преблаженне угодниче Христов и авво наш, Онуфрие Великий! Ты дивную любовь ко Господу твоему показал еси, и на дивныя подвиги благодатию Его укрепился еси, и сего ради велия дерзновения к Нему сподобился еси: многа бо чудеса и знамения силы Божия людем о тебе явишася. Воззри убо и ныне, отче предивный, благосердым оком любве твоея на ны, недостойныя рабы, и даруй всем по коегождо потребе, по вере же и упованию: скорбящия обрадуй, плачущия утешь, недугующия исцели, труждающимся помози, борющимся со страстьми и прилоги вражиими укрепи и благослови, изнемогающих поддержи, обитель твою и всех нас от враг видимых и невидимых и от всякаго зла сохрани. Возвеличи веру святую православную во отечествии нашем, обрати заблуждшия, вразуми отпадшия, утверди колеблющихся, умягчи упорствующие, просвети неверныя, и вся приведи в тихое пристанище Отечества Небеснаго. О, предивная слава монашествующих и всех верных утешение! Славными подвиги твоими и сладким лицезрением чудотворнаго образа твоего и нас озари и на всяк подвиг, труд и терпение укрепи во славу имене Божия, да спасеннии сподобимся с тобою и всеми святыми вечнаго и преблагословеннаго Царствия славы Отца и Сына и Святаго Духа во веки веков. Аминь.

#### Молитва вторая из службы с акафистом

О преизящный и превеликий пустынножителю, преподобне отче Онуфрие! Похваляю твоя неизреченная чудотворения и житие пресветлое, в немже от юности твоя даже и до старости подвизался еси. Никтоже бо исчесть возможен подвиги твоя, пречестне, но и преподобный Пафнутий твоему жестокому в пустыни житию удивися, вкупе же и зело возрадовался, обрет тя толиких подвигов и совершенства суща образ. Сего ради и аз грешный славословие от недостойных устен моих тебе приношу: о друже Христов, ревнителю Илии фесвитянину, Иоанну Крестителю наследниче, Египту умная красото, Фивеом великое светило, Ливии красная доброто, финиксе красноцветущий, орле высокопарный, в поднебесная возносяйся, на небесех же гражданство обретый! Молю тя, пречудный святых ликом ангельских совсельниче: услыши мя грешнаго и недостойнаго в час сей, и приими сие малое моление мое, великий притекающих к тебе заступниче, рукописание дел моих скверных и нечистых молитвою твоею

изглади, твоим заступлением присно мя покрывай и ко уготованному верным пресветлому чертогу молитвами твоими приведи; ибо, по Преблагословенней Владычице нашей Богородице и Приснодеве Марии, тебе в теплейших помощниках и заступниках почитаю. Умоли убо Милостиваго Бога, да отпустит ми вся прегрешения моя вольная и невольная и вся злая дела мною сотворенная, и да избавит мя твоим предстательством от вечных мук, и сподобит мя радости вечныя насладиться, купно со всеми святыми, во веки веков. Аминь.

### **Молитва третья**

#### ***из молитвослова***

О преподобне отче Онуфрие! Молим тя, услыши нас, грешных и недостойных раб Божиих (*имена*), в час сей. И приими сие малое моление наше: рукописание дел наших скверных и нечистых молитвою твоею изглади, твоим заступлением присно нас покрывай и ко уготованному верным пресветлому чертогу молитвами твоими приведи; умоли убо Милостиваго Бога, да отпустит нам вся прегрешения наша вольная и невольная и вся злая дела, нами сотворенная, и да избавит нас твоим предстательством от вечных мук и сподобит нас радости вечныя насладиться, купно со всеми святыми, во веки веков. Аминь.

### **Тропарь преподобному Онуфрию Великому, глас 1**

Желанием духовным пустыни достигл еси, богомудре Онуфрие, и яко бесплотен, в ней многолетне подвизался еси трудолюбне, соревнуя пророком Илии и Крестителю, и, от руку ангельску Таин Божественных насладився, ныне во свете Святыя Троицы купно с ними веселишися, моли спастися нам, твою память почитающим.

### **Кондак, глас 3**

Сиянием Духа Пресвятаго, богомудре, просвещься, оставил еси яже в житии молвы, пустыню же достиг, преподобне отче, возвеселил еси иже над всеми Бога и Зиждителя, сего ради прославляет тя Христос, блаженне, Великий Дарователь.

### **Величание**

Ублажаем тя, преподобне отче Онуфрие, и чтим святую память твою, наставниче монахов и собеседниче Ангелов.

*К святому преподобному Онуфрию прибегают с молитвою об избавлении от скоростижной смерти и в безнадежных детских болезнях, а женичины – в трудных родах.*

### **Молитва общая преподобным Петру**

#### **Афонскому и Онуфрию Великому**

#### ***из книги молебных пений***

Преподобнии и богоноснии отцы наши Онуфрие и Петре, светила земная пресветлая, от темных мест пещерных по всей земли славно просиявшии, и сию многими светозарными подобонаравнаго себе жития звездами онебесившии, и высоких добродетелей светлостями и чудес божественных блистаньями люди удивившии! Се вы ныне, смертным западом плотски на время во гроб зашедше, душам со Христом, Солнцем Правды, пребываете, и суще праведницы, просвещаетесь яко солнце во Царствии Небеснем. Тамо убо молитвенная ваша к Богу Свету лучи о всей вселенной простирающе, не забывайте и ны, присныя ваша молитвенники, аще

и в ночи страстей и скорбей пребывающая, свыше благодатными приизирати осиянии: яко да во свете добродетельного вашего жития право ходяще, сподобимся зрети свет неприступныя славы Божия, хваляще Его купно с вами в нескончаемые веки веков. Аминь.

## **Тропарь преподобному Петру Афонскому, глас 4**

Мир оставил еси, Петре, Господа ради своего и крест восприим на рамо свое, **на** гору достигл еси Афонскую, якоже древле фесвитянин Илия. И в ней пребыв пощением, и молитвами, и бдением, Бога милостива творя и Пречистую Богородицу Молебницу предлагая, сего ради вопием ти: моли Христа Бога, да спасет души наша.

## **Кондак, глас 2**

Удалив себе человеческого сожительства, в пещерах каменных и разселинах пожил еси, желанием Божественным и любовью, Петре, Господа твоего, от Негоже венец приял еси: моли непрестанно спастися нам.

## **Величание**

Ублажаем тя, преподобне отче Петре, и чтим святую память твою, наставниче монахов и собеседниче Ангелов.

*Преподобному Петру Афонскому молятся об освобождении из плена и заточения.*

## **Молитвы благоверной великой княгине Анне Кашинской**

### **Молитва первая из службы**

О преподобная и преблаженная мати Анно! Смиренно припадающе к раце честных мощей твоих, молимся со слезами прилежно: не забуди убогих твоих до конца, но поминай нас всегда во святых твоих и благоприятных молитвах к Богу. О преблаженная великая княгине Анно! Не забуди присещати чад твоих: аще бо телом и преставилась еси от нас, но и по смерти жива пребываеши и не отступаеши от нас духом, сохраняющи нас от стрел вражиих, всякия прелести бесовския и козней диавольских. Молитвеннице наша усердная! Не престай молящися за ны ко Христу Богу нашему: аще бо мощей твоих рака пред очима нашими выну видима есть, но святая душа твоя, со ангельскими воинствы у престола Вседержителя предстоящи, достойно веселится. К тебе убо припадаем, тебе молимся, тебе мили ся деим: молися, преблаженная Анно, Всемилостивому Богу нашему о спасении душ наших, еже испросити нам время на покаяние и невозбранно прейти от земли на небо, мытарств горьких и вечныя муки избавитися и Небесному Царствию наследникам быти со всеми праведными, от века угодившими Господу нашему Иисусу Христу, Ему же слава, со Безначальным Его Отцем, и с Пресвятым и Благим и Животворящим Его Духом, ныне и присно и во веки веков. Аминь.

### **Молитва вторая, чтомая в Петроградской Никольской единоверческой церкви**

Восхваляюще Господа Бога и Творца своего, приимшаго труды и подвиги угодницы Своея, благоверныя великия княгини Анны, немолчными усты воспоем и восхвалим: радуйся,

преподобная и богоблаженная княгине Анно, иже от юности своея нача Богу работати и Того святых заповеди усердно в сердца своем прияла еси, радуйся пречестное селение и жилище Святого Духа, иже всяку славу и честь и господство века сего оставила еси и до конца оплела еси, и ни во чтоже яко уметы положила еси вся сущая в мире, и Христу Единому последовала еси, и Его пречистое иго на раме носила еси, и многими добродетельными делы угодила еси. Радуйся, преподобная мати Анно, иже невозвратным путем шествовала еси по заповедом Владыки своего Христа, и ничтоже паче любви Его предпочте: сего ради и Христос возлюбил тя, яко невесту прекрасную, и с мудрыми девами в чертозе Своем сочетал тя есть, и по успении твоём соблюде пречистое тело твоё нетленно, душу же твою святую в премирная селения вселил, и многими чудесы обогатил тя есть. Радуйся, крепкая помощнице отечеству своему и граду нашему и всей области великое утверждение. Радуйся и веселися, угоднице Христова, ты бо врач показася всем приходящим с верою к цельбоносным мощем твоим и исцеляеши страсти наша неисцельныя. Молися, святая, Христу Богу нашему, даровати христолюбивому воинству на враги победу и одоление, миру смирение и всей Российской земли великое утверждение. Яко да и мы молитвами твоими получим оставление грехов, жития исправление и Небеснаго Царствия наследницы будем, благодатию и человеколюбием Господа Бога и Спаса нашего Иисуса Христа, с Нимже купно Отцу и Пресвятому и Животворящему Духу подобает всякая слава, честь и поклонение, ныне и присно и во веки веков. Аминь.

### **Тропарь благоверной княгине Анне, в иночестве Евфросинии, Кашинской, Тверской, глас 3**

Днесь восхваляем тя, преподобная благоверная великая княгине инокине Анно, яко лоза плодovита процвела посреде терния, во всех благочестивых великих княгинях, во инокинях же, аки крин процвete в винограде во граде Кашине добродетельми своими и всех удивила еси чудным своим житием, тем угодила еси Христу Богу, к Немуже взыде радующися и веселящися, и ныне пребываеши с лики преподобных жен, наслаждающихся райския красоты и веселия. Молим тя: моли о нас Человеколюбца Христа Бога нашего даровати нам мир и велию милость.

### **Ин тропарь, глас 4**

Просветившися Божественною благодатию, преподобная, и правостию умную душу твою привязавши в любовь Христову, тленныя, и красныя, и временныя ничтоже вменила еси. Крестным знаменiem на мысленныя враги мужески вооружившися, постническими подвиги, постом и молитвами углие страстей угасила еси, достославная Анно, и по смерти источаеши благодать притекающим к мощем твоим. И ныне, в Небесном чертозе с мудрыми девами предстоящи Христу, моли о нас, почитающих святую память твою.

### **Ин тропарь, глас 3**

Днесь восхваляем тя, преподобная мати, великая княгине инокине Анно: яко бо лоза плодovита посреде терния, процвела еси во граде Кашине твоими добродетельми, всех удивила еси чудным твоим житием, темже Христу угодила еси, и ныне, радующися и веселящися, пребываеши с лики преподобных жен, наслаждающихся райския красоты и веселия. Молим убо тя: моли о нас Человеколюбца, Христа Бога нашего, даровати нам мир и велию милость.

## **Кондак, глас 4**

Яко пресветлая звезда явилася еси в Российской земли, во граде Кашине, преподобная мати Анно, во всех благочестивых и верных женах, аки крин, процвела еси чистым и непорочным твоим житием, во инокинях же совершенными твоими труды и подвиги и взошла еси к вышнему граду, радуящихся и веселящихся, яко добре совершивши твое течение. И ныне честныя твоя мощи, аки бисерие драгое, явишася на исцеление всем приходящим с верою. Тем и вопием ти: радуйся, всекрасная душею, и моли Христа Бога о спасении душ наших.

## **Ин кондак, на обретение мощей, глас 8**

Скоропослушную помощницу, вси, сущии в бедах, благочестно воспоем, Анну святую, днесь любовию сошедшеся во обретение честных мощей ея. Воспоем песнь Единому в Троице Богу, радуящихся, сподобльшему нас видети пречистое сокровище честных мощей ея: от много лет сокровены быша, напоследок же нам явлены и источают многа и различна исцеления. Яко да молитвами ея к Богу от всяких находящих зол избавимся, радостною душею и веселием сердца благодарная воспоем, глаголюще: радуйся, утверждение граду нашему.

## **Величание**

Ублажаем тя, преподобная мати, великая княгине Анно, и чтим святую память твою, наставнице инокиням и собеседнице Ангелом.

## **Молитвы преподобному Арсению Коневскому**

### **Молитва первая**

#### ***из службы преподобному***

О всеблаженне и богоносне Арсение, отче наш! Сый во славе Небеснаго Царя Христа Бога, предстоя престолу Его со всеми Его святыми, не презри нас, долу сущих, грешных и недостойных, при честней раце твоей со слезами тебе молящихся, но приими сердечное стенание и бранных устен моление сие наше: тебе бо вси молимся, о преподобне отче! И тебе умиленно просим, буди о нас ходатай и молитвенник теплейший ко Всеблагодарному Богу. Моли благость Его, еже спасти нас от прегрешений наших, имиже весть судьбами. Молися щедротам Его, еже подавати щедро обители сей и всему миру потребная. Молися Дающему всем мир ниспослати мир церквам, собирая расточенная во едино и всякому верному в доме, и на пути, и на мори и повсюду дни благи и безмятежны даровати: благословити труды отцев и братий наших и простити всех согрешения вольная и невольная: яко да сподобимся и мы грешнии вкупе с тобою славити Отца и Сына и Святаго Духа в безконечныя веки. Аминь.

### **Молитва вторая**

#### ***из акафиста***

О преподобне отче наш Арсение, зрителю неизреченныя славы в Небесном Царствии. Не остави обитель твою, в нейже труды и подвиги о Христе подъял еси, но сохрани ю в мире и тишине, да пребудет незыблема от ухищрений врагов видимых и невидимых. Укрепи в доброделании чад твоих, их же собрал еси, мудре, во обитель твою, да познают звание свое, да будут достойны попечения о них Богоматере. Посети с высоты небесныя всех верно притекающих к

тебе животворною твоею молитвою. Плавающих на мори управи. Волнения моря жития сего утиши. Церковные раздоры укроти. Мир миру у Господа всем нам испроси. Болящих уврачуй спасительным твоим заступлением. В скорбех буди утешитель и наставник благий. Всем буди вся, яко же был еси и в земнем житии твоём. Сотвори к Богу молитву, ибо дана ти есть благодать молиться за ны. Вемы бо, вемы воистину, яко много может молитва праведника, поспешествуемая ходатайством Богородицы. Аще и недостойны есмы, обаче и нас вручи Ея всесильному покрову и заступлению, да сподобимся улучшить блаженство в Царствии Сына Ея, Христа Бога нашего, купно с тобою и всеми святыми во веки веков. Аминь.

### **Тропарь преподобному Арсению Коневскому, глас 1**

Божественною любовью возгоревся, мирская же пристрастия от души отринув, тесным путем постничества вослед Христа невозвратным умом шествовал еси, Арсение преблаженне, от Негоже и мзду трудов твоих на небесех восприим, поминай нас, чтущих святую память твою и вопиющих: слава Давшему ти крепость, слава Венчавшему тя, слава Действующему тобою всем исцеления.

### **Ин тропарь, глас 4**

Духом Божиим наставляем, возлюбил еси безмолвие, в немже евангельски подвизающуся, пречудный Афонский дар, Богоматере икона, даровася ти, преблаженне, и образ добродетелей быв стаду твоему, Арсение, отче наш, к горнему торжеству возшел еси, идеже со Ангелы ликовствуя, моли Христа Бога спастися душам нашим.

### **Кондак, глас 8**

Трисиятельного Божества сиянием просветив сердце твое, преподобне, световиден весь явился еси добродетельми, яко и Гору Афонскую свет трудолюбия твоего озари, идеже святую икону Солнца истинного, Христа, и Его Пречистыя Матере в дар приим, на остров Нева озера пришед, обитель устроил еси, всеблаженне. Тем, верою и любовью к тебе притекающе, радостно вопием: радуйся, всесветлый светильник, Арсение отче наш.

### **Величание**

Ублажаем тя, преподобне отче Арсение, и чтим святую память твою, наставниче монахов и собеседниче Ангелов.

### **Молитва преподобным Вассиану и Ионе Пертоминским, Соловецким чудотворцам**

## **Конец ознакомительного фрагмента.**

Текст предоставлен ООО «ЛитРес».

Прочитайте эту книгу целиком, [купив полную легальную версию](#) на ЛитРес.

Безопасно оплатить книгу можно банковской картой Visa, MasterCard, Maestro, со счета мобильного телефона, с платежного терминала, в салоне МТС или Связной, через PayPal, WebMoney, Яндекс.Деньги, QIWI Кошелек, бонусными картами или другим удобным Вам способом.